

四庫全書

史部

欽定四庫全書

史部

江南通志卷十一

詳校官給事中臣丁雲錦

檢討臣德生覆勛

總校官編修臣王燕緒

校對官中書臣葉炎

謄錄監生臣龔果

欽定四庫全書

江南通志卷十一

輿地志

山川一

江寧一府

自崑崙南幹以江為限其分而趨北之支自浙之
仙霞嶺北為黃山為九華並江而東為鍾山中幹
以河為限其歧分中支自河南之桐柏山東南為
大蜀小蜀為天柱而諸山在江南北者又從分支

縷析翔伏蛇蟠大抵複嶂抱流雙渠環阜而人文
物產之興此其脉絡也歸有光論區宇混一修書
宜倣禹貢周官序山川必先其原委此又以山川
之原委明然後備禦疏浚可得而詳也若夫海湧
地肺之峰笠澤通波之水我

朝德教光華倍增靈秀

聖祖仁皇帝翠華臨幸

天章神翰藻采輝賁山川奠寧萬世長新矣

江寧府

鍾山在府東北十五里朝陽門外本名金陵山据
庾闡揚都賦云山時有紫氣故又名紫金山高一
百五十八丈周迴六十里東連青龍北接雉亭諸
葛亮云秣陵地形鍾阜龍蟠是也漢秣陵尉蔣子
文吳為立廟此山因改為蔣山又曰聖遊山又曰
北山即南齊周顒隱處明嘉靖中詔改為神烈山
兩峰秀起北一峰最高其上為太子巖即昭明讀

書臺八功德水在其下

一清二冷三香四柔五
甘六淨七不蝕八蠲疴梁

以後取供御案南有岡曰獨龍峰曰玩珠山半有

井曰應潮或云其水與江潮為盈縮麓有霹靂溝

有曲水晉海西公疏以宴百僚宋時三月三日祓

除於此通鑑胡三省注自山趾築道坡陀以登山

名曰龍尾一名龍廣山北五里為蒼山挺秀殊衆

唐地理志云江南道其名山衡廬茅蔣朱子亦云

天下山皆發源於岷山蔣山實其脈之盡者自六

朝以來最稱佳麗琳宮梵宇計七十餘所功德水
南曰半山墩半山者王安石舊宅所謂報寧禪院
也自城中上鍾山此為半途故曰半山夾道皆長
松髯甲天矯如蛟龍往往數百年物太子巖西曰
栽松峴輿地志云蔣山本少林木東晉令刺史罷
還栽松百株宋時令刺史栽松三千株郡守以下
各有差至今為盛山後有洞曰朝陽上有高廳館

九日臺

附

元胡炳文鍾山遊記

江以南形勝無如昇鍾山又昇最勝

處予至昇首過上元謁明道先生祠禮畢即度關
遊山夾路松陰亘八九里清風時來寒濤吼空斯
須寂然如故路左入半山先是謝太傅園池荆公
宅之捐為寺至今祠公與傳法沙門等出行三四
里又入一寺弘麗視半山百倍龕鏤壁繪光彩奪
目詭狀萬千兩廡級石而升四五十丈始至寶公
塔塔邊有軒名木末履烏之下天籟徐鳴浮嵐暝
翠可俯而挹下有羲之墨池投以小石遠聞聲出
叢葦間其徑荒蕪遊客罕至獨拜塔者累累不絕
長老云寶公巢生里人朱氏取而予之後成佛几
禱水早疾疫如響語多不經由塔後循山而左過
安石讀書所山石岬壘忽敞平原脩篁老檜萬綠
相狀風鳴交如猶作當時唔吟聲又行數里休於
觀音亭其旁八功德泉有聲鏘然汨汨至亭下則
困然以涵或謂病者飲此立瘳衆相欲予以無疾
不飲遂回塔後攀松升磴六七里至山椒鉅石人

立于空石以坐，厚臺驚洲渺不知在何許，但覺綠
白紫青，隱見烟霧間。城中數萬家，樓閣如畫其間。
曠無人處，六朝故宮也。北視揚子江頭，一舟如葉
行移時，不翅浪楫風帆，想數十里遙，蟠龍踞虎，亘
以長江其險也。如此黃旗紫蓋，有時而終，令人淒
然久之。下山至七佛庵，白雲淒潤，器瑤不來，一僧
噓石爐，灰點茶鬚，眉如雪，一僧蓬跣，岸邊拾松子
以歸，語客質木絕，不與前寺僧類，聞其下有猛公
庵，子文廟山水，稍奇麗，率為事神，若佛者，家馬欲
訪猿鶴山堂，莫得其處，遂朗吟小山招隱，循故道
御天風而下，兩袂如飛，亟入關，復至明道精舍，少
憩而歸，因喑喑曰：昇自紫髯翁以來，幾興衰矣，眼
前花草無復當時光景，伯子春風千年猶將見之，
至若熙寧相業，非不焯焯然炫人耳目，迄不如主
上元簿者復利於學何哉。

國朝李蘭鍾山賦

粵稽聖秋之典載考職方之書維名山之峻極乃作鎮於雄都越江表而

題觀覽鍾阜兮盤紆映斗宿之靈曜跨金陵之奧區擬崇隆於嵩霍齊名騰於匡廬洵瑰奇之所宅寶神異之攸居爾乃觀其形勢偉麗雄秀萬壑奔騰千巖幅輳牛首峙其前雞籠居其右溫泉湧其左元武帶其後水淙淙以赴淵雲容容而出岫湍流可枕礪石堪激俯臨城郭近接田廬朝烟倏變暮景全殊晴雲掩映陰靄濃敷或見或隱或吞或舒勝幻質於俄頃極異態於須臾至若怪石星羅奇峰陣列凌跨霄漢蔽虧日月鳥道凌迤羊腸曲折路嵌側而可通運盤旋而忽絕崎嶇百壑宛轉千迴屹嵯峨而叢繁復巖嵒而雀鬼履險途而趨越涉磴道而徘徊循狹之麓傍山之隈近矚心怡遠眺懷開意渺八紘志狹九垓憑高峯而極目對天際之長江觀波濤之澎湃觀洲渚之蒼茫泛估

舟與官舫盡楚舶與吳檣當其乘風而破浪儼若
夫飛隼之翔翔危夫風恬而浪靜又似乎游鳧之
頡頏閱層波之渺渺嘆逝水之湯湯亘終古其如
斯緬水德之靈長此乃川瀆之壯觀而與茲山並
著於巖疆者也乃有茂林陰翳灌木成叢九九翠
柏落落青松春深綠樹秋盡丹楓曲水流觴翹晉
朝之盛事遊山射雉仰齊代之遺蹤沈僕射之郊
園但餘淶水蕭德施之書邨杙對秋風靈谷之寺
建於山側梁帝之所遊豫誌公之所駐錫梵宇輝煌
琳宮萃萃街號琵琶泉名功德入門而松逕十里
仰瞻而塔光五色洵淨域之偉觀寶香城之絕特
若夫春日載陽風融景和遊人雜遝士女駢羅逍
遙乎林之藪放蕩乎山之阿以偃以息載嘯載歌
又有高士携筇幽人命駕或踞乎山之巔或立乎
雲之下悵景物之遞新感時序之代謝聊登山而
臨水庶寫心而銷暇於是移高就下越陌度阡離

離坂隰每每原田農夫荷畝於隴畔稚子饁餉而往旋成含哺而煦煦盡鼓腹以便便歌詠太平之福優游豐稔之年耕食鑿飲以安於熙皞之化出作入息而忘於知識之天蓋盛世之德周而仁溥斯山川之祥集而瑞全故記有之天不愛其道而降甘露地不愛其實而出醴泉也伊斯山之奇特匪筆墨之能究惟仁者之是樂實廣大而博厚體既立靜致亦宜壽保不虧而永回表綱紀於宇宙維登高之作賦羨古昔之名賢茲搦管以數陳希追踪而比肩彼夫玉樹青蔥子雲貽譏於往論虛摘夏燕長卿見笑於前編要體宏而用大原無事於侈言撰斯文以志勝任評騭之姓妍

覆舟山在府東北太平門內形如覆舟故名方輿勝覽云覆舟山東連鍾山北臨玄武湖一名龍山

宋元嘉中嘗改名玄武山陳大建中又改為龍舟山舊有甘露亭瑤臺閭風亭藏冰井

雞鳴山在府東北覆舟山之西其北臨玄武湖寰宇記云西接落星澗北臨培元塘本名雞籠山宋元嘉十六年徵廬山隱士雷次宗至建康開館於雞籠山使聚徒教授南齊竟陵王子良於雞籠山西邸集學士抄五經百家依皇覽例為四部要略千卷即此府志云明初於山巔建觀星臺賜名欽

金山府志卷十一
天山左右列十廟繚以朱垣其東麓為雞鳴寺有
普濟壇

國朝康熙二十三年

聖祖南巡幸雞鳴山登北極閣

御書曠觀二字

雉亭山在府東北二十五里石邁古跡編云齊武
帝東遊鍾山射雉因名舊志云吳大帝時蔣山神
執白扇乘馬見於此又呼為騎亭山

祇闍山在府東北舊有祇闍寺

白山在府東北三十里鍾山北攝山南輿地志云
山產白石可為碑礎南史云梁散騎常侍韋載有
田十餘頃在江乘縣之白山築室屏居即此

臨沂山在府東北四十里與雉亭山相接西臨大
江其西南有臨沂舊縣因名

衡陽山在府東北四十五里清風鄉府志云昔朗
法師居此有衡陽神女來聽講後為北山之神因

名

攝山在府東北四十五里山多藥草可以攝生因名輿地志云攝山形方四面重嶺似繖亦名繖山西北有水注江乘浦入攝湖即秦始皇所從渡江者南史云齊明僧紹居此山後捨宅為棲霞寺齊時隨石大小鑿佛像千餘名千佛嶺右為天開巖有白乳泉白鹿泉又有般若堂明月臺宴坐石高下相望勝處極多東巖下有畫石山中有石穴曰

花洞相傳與句容華陽洞通

落星山在府東北舊圖經云昔有大星落此因名
西臨大江吳時建樓吳都賦曰數軍實於桂林之
苑享戎旅乎落星之樓劉逵注云樓在建業東北
十里宮苑記云桂林苑在落星之陽吳苑也

觀音山在府北觀音門外北濱大江連亘幕府諸
山皆峭削壁立形如錯繡有觀音閣嵌懸巖上昔
時江流閣下今隔洲渚移去里許矣

大壯觀山在府北十八里東接鍾山南臨玄武湖
陳立大壯觀於此南史云陳太建十年帝幸大壯
觀閱武是也

直瀆山在府北二十五里旁有直瀆吳主孫皓所
開因以名山其流北注於江

四望山在府西北十里定淮門外南接石頭北連
獅子吳大帝嘗與葛元共登晉書溫嶠討蘇峻築
壘於四望磯以逼石頭按府志云山下有磯也

幕府山在府西北二十里得勝門外通鑑注即晉王導迎琅邪王東渡建幕之處故名北濱大江與直瀆諸山接為建業門戶梁書齊師至鍾山龍尾陳霸先自率麾下出幕府山齊人大潰即此東南麓有武帳岡古宣武場地宋文帝曾於此閱武仙人臺虎跑泉皆在其上又有夾蘿峰達摩洞相傳達摩折葦葉由此渡江山多石居人煨以為灰又名石灰山

盧龍山在府西北二十五里一名獅子山山嶺繇
延遠接石頭晉元帝謂似北地盧龍故名明太祖
嘗伏兵大破陳友諒於山下按宋濂閩江樓記云
京城西北有獅子山自盧龍蜿蜒而來則盧龍獅
子似為兩山所謂本同末異者也

馬鞍山在府西北與盧龍相接府志云山以形名
土山在府東南二十里一名東山無巖石建康實
錄云吳景帝自會稽還曲阿即日進至布塞亭孫

緝迎於土山之野晉書云謝安於此山營立樓館

往來遊集以擬會稽東山與姪玄園棋賭墅在此

有謝公墩即安與王右軍所登悠然遐想處附明

顧起元金陵東山考

會稽臨安金陵三郡皆有東山俱傳以為謝安携妓之所

按謝安本傳初安寓居會稽與王羲之許詢支遁
遊處被召不至道棲遲東山唐裴冕與呂謂等鑿
湖聯句有興發還尋戴東山更問東此會稽之東
山也本傳又云安石嘗任臨安山中坐石室臨滄
谷悠然嘆曰此與伯夷何遠今餘杭縣有東山東
坡有遊餘杭東西岩詩注云即謝安東山所謂獨
携縹緲人來上東西山者是也此臨安之東山也
本傳又謂及登台輔於土山營墅樓館林竹甚盛

每攜中外子姓游集今土山在建康上元縣崇禮鄉
建康事迹云安石於此擬會稽之東山亦號東
山此金陵之東山也然南史載宋劉劭經始鍾
嶺以為棲息亦號東山金陵遂有兩東山矣

張山在府東南三十里淳化鎮北南史云齊明敬

皇后葬江乘縣張山即此旁有虎洞下有玉泉

石碗山在府東南三十里山壘皆石祥符圖經云

碗一作櫃此山橫據秦淮之上以扼水勢若櫃然

故名孫盛云自方山至此是秦所鑿斷處府志云

一名竹山

青龍山在府東南三十五里山趾石堅而色青郡人多取為碑礎唐李白詩白鷺映春洲青龍見朝暉指此又南唐書後主獵青山戚光音釋引郡志曰青龍山是青龍亦名青山也

祈澤山在府東南三十五里東連彭城北連青龍舊經云山有祈澤寺初法師嘗結茅於此有神女來聽講神泉湧出講座下後遂為水旱祈禱之所方山在府東南四十五里山周二十七里高一百

一十六丈四面方如城吳葛仙翁所居上有石龍池下有葛公井一名洗藥池秦鑿淮水經其下山頂方正丹陽記云形如方印故名天印

彭城山在府東南四十五里祈澤山東有水下注成渠上有橋舊有彭城館

湯山在府東南六十里湯泉出其下大小凡六穴張渤吳錄云丹陽江乘縣有湯山出泉即此地也四時常熱草木灌之愈鮮茂宋劉義恭有湯泉銘

雁門山在府東南六十里西連彭城山金陵新志
云山勢連亘類北地雁門因名輿地志云山東北
有溫泉可浴飲之能治冷疾一名陽山按唐李白
金陵江上詩云綠水向雁門黃雲蔽龍山雁門即
此雁門山金陵龍山有二覆舟巖山舊皆有龍山
之名註者失之耳

竹堂山在府東南七十五里輿地志云白山雁門
竹堂并連帶建康縣北綿延三四十里

武岡山在府東南二十五里石邁古迹編上有石佛十餘軀舊傳唐武后造按晉書武岡王尊所封山以尊得名如幕府之類疑近是

符堅山在府東六十里府志云謝玄破秦歸謝安問其方略玄指此山曰此若符堅駐軍之山因以為名

大城山在府東七十里西接雁門北連竹堂

雲穴山在府東八十五里南有水流入石驢溪有

洞穴甚幽邃天欲雨則穴中雲出因名

以上俱上

元縣

石頭山在府西二里石城門內丹陽記云石頭因山為城因江為池謂之石首城又名石城山後漢建安十七年城石頭劉達吳都賦注云石城石頭陽也在建業西臨江其中有庫藏軍儲輿地志云即楚金陵邑地吳晉時江流山下最為險要其上築城以守之下有龍洞又名桃源洞山後有駐馬

坡諸葛亮嘗駐此以觀形勢謂之石頭虎踞是也
東麓有虎踞關江乘記云石頭城山嶺嶂相重游
歷者以為猶楚之九嶷云

清涼山在府西六里清涼門內上舊有清涼臺俯
瞰大江南唐翠微亭遺址在焉

冶城山在府西石城門內本吳冶鑄處六朝時有
東西二冶元和郡國志云王導移冶於石頭東牖
樓山以故地多園亭太元十五年建冶城寺於此

謂之冶亭陸游入蜀記云天慶觀在冶城山之麓
觀西有忠烈廟卞壺廟也東北有忠孝亭并以壺
二子死父難也天慶觀即今朝天宮又有東冶亭
在半山寺後王安石詩云遙望鍾山岑應知冶城
路謂東冶亭也

陰山在府西南十二里臨大江府志云晉王導至
此山神見夢於導以其事聞為立廟故名陰山舊
時江水自三山東入泇陰山石子岡北流以達於

石頭故元時有陰山運道

湖山在府西南三十里上有湖久旱不涸

龍口山在府西南三十五里戚氏志云山有李琮墓前有三城湖

車府山在府西南四十里府志云六朝嘗於此山藏車乘器甲因名

三山在府西南五十七里吳志晉王濬伐吳順流而下直指三山是大江從西來勢如建瓴此山

突出當其衝有三峰吳時津戍處輿地志云其山積石森鬱濱於大江三峰行列南北相連唐李白詩三山半落青天外即此

雲臺山在府西南六十里府志云山南有古松夭矯百尺儼若圖畫下有泉澄泓可愛西迤十里曰虎肱洞有巨石若困蓋復有石丈人春社報賽為勝蹟云

白蕩山在府西南七十里北接高墟山

烈山在府西南七十里乾道志云山近烈洲居大江中四面峭絕風濤洶湧商旅嘗泊舟依山以避之山頂舊有侯將軍廟祀陳將侯瑱金陵志云瑱嘗破王琳於此功烈甚大故名烈山宋寶祐初有僧建庵其上自名為江心護國寺晁無咎以比潤州之金山

白都山在府西南八十里西臨大江輿地志云昔有白仲都於此學道昇仙故名下有白都湖上有

仲都祠

慈姥山在府西南一百十里與當塗縣界輿地志
云山臨大江巖壁峭絕山南有慈姥神廟陸游入
蜀記云慈姥磯磯之尤巉絕峭立者徐師門有慈
姥磯詩序云磯與望夫石相望正可為的對

天竺山在府西南一百二十里東有水下注慈姥
浦府志云本名多野山唐上元間有天竺福興寺
僧道融駐此因名

鳳臺山在府西南聚寶門內宋元嘉中王顓見異鳥集於山時謂鳳凰遂起臺焉陸游入蜀記云保寧寺有鳳凰臺攬輝亭有李太白詩

聚寶山在府南聚寶門外山產細石如瑪瑙因名其東巔為雨花臺輿地紀勝云梁武帝時雲光法師講經上天為雨花山麓為梅岡晉豫章內史梅頤家於此上或謂之梅陵相傳為梅鎬屯兵處舊多亭榭自六朝迄今為郡人遊覽勝地

戚家山在府南聚寶門外景定志云在天禧寺東
南唐遺事云韓熙載居此按天禧即今報恩寺

梓桐山在府南十五里山下有謝氏詩樓及繙經
臺基尚存府志云本名梓樹山山北為石子岡

紫巖山在府南與梓桐山相近陳軒金陵集南唐
李建勳有春日紫巖山期客不至詩

翠屏山在府南十五里山色碧如翠羽因名古新
亭在焉相近有韓府山韓憲王葬此舊名鳳凰山

夏侯山在府南二十里府志云梁儀同夏侯亶嘗愛其風景卜居山下因名

牛首山在府南三十里舊名牛頭山兩峰峙如雙角卽佛書所稱江表牛頭者也晉王導以其遠對宣陽門指為天闕故又名天闕山梁武帝建寺於石窟下更名仙窟山有兜率巖芙蓉嶺文殊辟支二洞白龜池虎跑泉昭明太子飲馬池由山麓石磴數百級杉檜森夾而上有弘覺寺寺有浮圖二

殿宇依山而構望之如畫屏又有含虛閣前對三
山大江旁繞尤為勝處通鑑晉人築南郊壇於巳
位宋大明二年詔徙於牛頭山直宮城之午位宋
建炎中岳飛設伏兵於此以拒烏珠明武宗南幸

嘗駐蹕山中 附明都穆遊牛首山記

金陵多佳山
牛首為最

據城之南初名牛頭以雙峰並峙若牛角然佛書
所謂江表牛頭是也晉王丞相尊嘗指曰此天闕
也後又名天闕山云丁卯七月二十有三日吏部
主事顧華玉與予約客戶部員外郎王子和朱升
之國學士陳魯南而予兒元翁侍焉遂共出鳳臺
門南行十五里至塘灣又南行十里度嶺又三里

抵山舍西上二里達弘覺寺門內二井其左曰白
龜池右曰虎跑泉後僧以其險更甃為井而虎泉
尤清冽寺泉汲於此躋石級庭中銀杏一株圍可
二丈午食畢登浮圖至其巔有聯句詩經修廊東
行綠石魚貫上登觀音閣憑欄俯視第見浮圖之
尖再上間有捨身臺及辟支佛足跡以峻險不及
觀下至兜率巖空洞上突出如屋久之至文殊洞
前有屋一楹衆復聯詩書壁上既而登山之脊觀
蕭昭明飲馬池徑可丈餘冬夏不涸下而西至辟
支洞廣差勝文殊石浮圖立其前辟支舍利所藏
處也老僧言少嘗見舍利放光今數十年矣浮圖
有石刻二其一宋皇祐二年記不著撰入中藏誌
公荅宋明帝語云昔辟支佛冬居於此其一乃如
愚居士詞字絕類黃太史居士殆隱逸之儔其西
下經禪堂旁室闕其門有窠如錢日光射浮圖影
側掛佛案紙上不可曉也夜燕方丈予以倦睡去

衆作詩韻險至雞號乃罷二十四日早出寺而南山路極峻馬屢前却時雲霧四興遙視山足則日光在田禾黍映之綠黃紫碧如僧伽黎予笑語三君不知身之在人間世也五里至獻華巖石益奇麗中虛深可十步儼若堂宇相傳唐高僧法融嘗居其中有白鳥獻華之異巖因以名山故有幽棲寺今廢成化間山東僧道興至堅坐不動有財者樂為之施寺由是復興今名華巖巖之南曰屯雲亭又南曰芙蓉閣閣嵌巖石登其上羣峰攢簇在目睫山之最佳處也衆共飲焉北下僧廬其扁曰無邊風月可坐眺遠又下有軒曰無塵仍飲賦詩又二里出山是為記

花巖山在牛首山南五里即祖堂山金陵志云牛首之南為祖堂周四十里高百二十七丈本名幽

棲唐貞觀中改名沿山一石橋入山徑至花巖寺
右有石窟甚深廣佛書云唐貞觀中法融師居之
大雪時忽有奇花二莖生於巖側又有白鳥獻花
之異因名獻花巖府志云山有芙蓉峰拱北峰天
盤嶺西風嶺中峰伏虎洞神蛇洞象鼻洞息泉太
白泉長庚池諸勝明成化中葺興幽棲寺賜額華
巖因法融得道於此為南宗第一改為祖堂山舊
志分為二山非是

巖山在牛首山東北建康實錄云吳天璽初嘗立
石刻於巖山紀功德丹陽記巖山東有石碣長二
丈折為三段乃吳大帝天發神讖碑或云皇象所
書段石岡名以此宋孝武改曰龍山景寧陵在焉
青山在牛首山南十里建康實錄云梁置幽巖寺
大毘曇師傅云承聖二年法師入秣陵青山始創
舍名曰幽巖與佛窟寺相近南唐書後主嘗獵於
此山還如大理寺親錄繫囚多所原釋郡志云山

在城東三十五里然城南四十里亦有青山

觀山在府南三十里東有水下注新林浦一名觀

子山

吉山在府南四十五里西臨大江宋將軍建城侯

吉翰葬此因名

朱門山在府南七十里又有男山女山姑山與此

山並相聯絡森秀聳拔

銅山在府南七十里府志云昔人採銅於此因名

慶元志云山南名金牛坑

鼓吹山在府南八十里縣志云宋孝武大明七年
自江寧南登此山奏鼓吹因名

橫山在府南一百二十里西接太平南連溧水四
方望之皆橫又名橫望山有十五峰正峰頂有陶
弘景丹井春秋傳楚子重伐吳之所至也 以上俱

江寧縣

附 明陳沂金陵諸山圖考

唐志稱東南名山衡廬
茅蔣金陵有二馬蔣山

故名鍾山實都邑之鎮武侯所謂鍾山龍蟠是也
宋周應合山川序云鍾山之左自攝山臨沂雒亭
衡陽以達於東又東為白山大城雲穴武岡以達
於東南又南為土山張山青龍石碗天印彭城雁
門竹堂以達於南又南為聚寶城家梓桐紫崖夏
侯天闕以達於西南綿亘至三山而止於大江所
謂龍蟠之勢也鍾山之右近之為覆舟雞籠在宮
城之後又北為直瀆大壯觀四望以達於西北又
西北為幕府廬龍馬鞍以達於西是為石頭城亦
止於江所謂虎踞之形也然考其山之遠近城之
連脈亦少有不合者蓋東南之山關城重抱山勢
連屬不可一一次序言之且古之江水自三山東
入沿陰山石子岡北流以至於石頭又自石頭沿
馬鞍四望廬龍幕府東折至於觀音又由臨沂攝
山直抵京口二百餘里山勢不絕浮江而觀之三
山據於西南石頭據於西北秦淮中出乃天限之

門戶也今江水西流沙洲曠邈馬鞍峰臺為民居日削而陰山則陶冶為澤漸不可尋矣此則圖其形勢之
大者焉

茅山在句容縣東南高三十里周百五十里真誥稽神樞云句曲山古人謂為金壇之虛臺天后之便闕山形似已故以句曲為名又名已山相傳漢時茅氏兄弟三人得道於此因名唐明皇勅稱為嶽吳越春秋云禹巡天下登茅山以朝羣臣曰會稽其山逶迤磅礴同出而異名者良常秦望海江

仙韭之屬凡二十有六實一山也其最高者曰大
茅峰又中茅小茅其他為洞為巖為泉為澗為岡
為峪不可勝紀道書所謂第八洞天第一福地金
陵地肺是也漢光武建武元年遣使以黃金五十
斤獻三茅君山頂有埋金處又有丹砂鎮此山
泉皆赤色飲之延年幽奇瑰偉絕異羣山許邁以
為潛通五嶽允為江南之鎮梁陶弘景隱居於此

國朝康熙四十四年

聖祖南巡

御書第八洞天四字中峰之北有桃花崦春時華卉紛敷
不減武陵源

彭山在句容縣南七里峰巒秀聳泉水環流上有
白巖寺

秦山在句容縣南三十里有明月灣通秦淮張鉉
新志云謝安月夜乘舟釣於此

石屋山在句容縣南六十里乾道志云吳王使歐

冶鑄劍於此西有鑄劍坑

青龍山在句容縣南七十里一名洞山上有石窟
真誥云與華陽洞通其中堂臺簾竈及仙人掌俱
因石狀以名傍有峴曰牧門洞前怪石森列而流
泉貫其中歷旱不竭

絳巖山唐書地理志在句容西南三十里有絳巖
湖絳巖故赤山天寶中更今名按舊志謂山一名
赭山漢丹陽郡有赭山漢丹陽郡縣取名本此今

考漢丹陽縣治在今府西南五十里俗謂之小丹陽非今句容縣境晉書志丹楊縣丹楊山有赤柳在西也項安世家說云丹楊以多赤柳在丹楊山晉書南史並用楊字與句容之絳巖懸隔矣

甲山在句容縣西南五十里宋景定間僧行昱愛其山奇勝甲於左右諸山因名

姜石山在句容縣西北二十五里有梁南康簡王墓

射鳥山在句容縣西北五十里湯水二泉其源皆
出此又有巖山近琅琊城

胄山在句容縣北三十五里其山高聳如介胄因
名俗訛紂山

華山在句容縣北六十里與上元縣界亦名花山
臧氏志云秦淮之水源於此方輿記云梁武帝登
此山問何如蔣山高薛對曰華山高九里似與蔣
山等泉水倍多府志云明萬厯中李太后夢登一

山皆蓮遍訪得此山建銅殿一與武當金殿同賜額聖化隆昌寺今藏經尚存

竹里山在句容縣北六十里元和郡國志云山間有長澗高下深阻方輿記云山途款險號曰翻車峴晉劉牢之至竹里擒王恭帳下督顏延宋武帝軍於竹里破桓元將吳甫之是也六朝時京口至建康皆取道於此

戍山在句容縣北六十里北臨大江府志云相傳

劉宋沈慶之曾此防戍

崙山在句容縣東北五十里府志云東連駒驪山
四十二福地也金陵志云唐肅宗時謁者伍達靈
在此山得道去後記於絕頂石壁今尚存髣髴可
辨下有伍達靈壇又十里為駒驪山

虎耳山在句容縣東三十里一名苦耳山

中山在溧水縣東十里元和郡國志云山出兔毫
為筆精妙唐宋皆充貢宋周邦彥插竹亭記謂中

山為溧水之勝圖經云一名獨山謂孤聳不與羣山接也或轉訛為濁山

東廬山在溧水縣東二十五里山形似廬唐十道志寰宇記皆云嚴光曾結廬於此因以為名有水源三一入秦淮一入馬沉港一入丹陽湖丹陽記云縣東有廬山故謂之東廬山非以東廬欲別匡廬也

鷲山在溧水縣東南二十五里縣志云巔有育德

泉涇涇一窟味甚甘冽中有蜥蜴歲旱取水禱雨
輒應相近有石城山舊有石城院冷水亭遺址

回峰山在溧水縣東南四十里金陵新志云上有
龍池下有龍泉有水注平陸

仙杏山在溧水縣東南四十里舊志云絕頂有杏
林及仙人足跡因名又有三仙壇三所及丹井清
泉流入丹陽湖一名仙壇山

觀山在溧水縣東南五十里山形陡峻有石屋可

容多人上有泉注池四時不竭

芝山在溧水縣東南七十里並界高淳溧陽景定志云山產芝草故名有洞數十梅山洞者漢梅福居之又有李洞泉出沸湧有燕洞產石燕金陵志云宣州田頽舉兵邑人避難於此

國朝蕭秉晉有芝山記

芝山在邑治東南七十里跨溧陽境遠視之蔭然數阜也山多

怪石皆黝色鱗次疊疊成波紋大者如獅象如馬牛小者如猿猴如禽鳥巖奇變態起伏橫側疑神工鬼斧刻刻以成每巨石聚處即隱洞穴舊謂有三十六洞云今可尋者僅六七耳非土人導之不克

入入必令一人執松火而前初入之如墮深井闇
若長夜先後踵頂相接而下暗中石級可尋忽
至坦處可容數十百人石色紺赤光絢駭目即震
澤石不過也所稱古燕洞亦名堆霞入穴數十武
忽排空轟起丈餘轉數武又變一狀每一折旁引
一門下坦可數十武中有石臺平起如席如几云
是仙子棋枰遊者至此得以鵲馬仰視之螺旋而
上火光漸弱憾不能窺其頂也石燕見人輒驚飛
鳴聲殿雷久之潛入竇穴昔黃山人所謂仍落為
石者妄也旁列三門亦漸狹委蛇陡峻其盡處一
水如帶闊可五六尺深淺莫測遙望若有岸相對
人莫敢踰所謂仙几隔處端在此矣黃龍洞僅如
竇數折而下有巨石懸覆如板廣三四丈其色白
作龍蟠形皆石液所凝宛如刻畫者又一竇直上
有大士像懸石壁間名觀音洞梅仙洞初入險陡
如鋸鋒客橫行其上作螭狀手攀東則足抵西下

視深闊如無底而坦處又堪坐卧天井洞景獨外
露不類他洞峰石叠甃如崩如墮忽一坦處方幾
畝仰視高三四丈如天井故名旁有穴兩折而下
不甚深平如屋風雨不及可陳几榻凡此數洞皆
在邑界跨溧陽境者不悉志大約此山洞皆通連
或為榛莽所封或為亂石壅塞安得遊人如謝康
樂之好事柳子厚之於馬退諸山則靈跡異境必
標而出之不致隱晦為幽壤耳又洞中最異者山
泉泓濕泥水滴漚疑汚人衣履然入者苟不言則
不稍染又絕無蚊虻虺蜴之屬誠一邑之奇觀惜
地界僻左名流罕至莫紀其
勝晉故從所觀而率記之

醫船山在溧水縣南十二里一名慮泉山建康志
云山陰有青絲洞泉脈澄泓四時不竭南有張沈

二士書堂井白遺址不知何時人

杜城山在溧水縣南十二里縣志云隋大業末杜
伏威嘗屯兵於此因名明末有僧結廬其巔曰巢
雲庵泉木幽勝

無想山在溧水縣南十五里上有唐建禪寂寺南
唐韓熙載讀書臺址古檜銀杏皆唐宋間植有招
雲亭元謝琰為記山頂有泉下注巖石間成瀑布
清洪山在溧水縣南三十里上有石龍潭土人嘗

采石於此

方山在溧水縣南六十里與芒山青龍洞相接

石羊山在溧水縣西南三十七里府志云舊名金華山即黃初平叱石成羊處有牧羊仙洞

臘山在溧水縣西南六十里府志云跨石白湖東接鳳棲西迎雀壘山翠湖光極雲水烟嵐之勝鳳棲山近石白湖雀壘在湖中

乳山在溧水縣西三十里巖石巉削山下有玉乳

泉淳注澄澈味極佳明末閩人林茂之隱此

烏山在溧水縣西北二十五里

赤虎山在溧水縣北三十三里金陵志作赤龍

大人山在溧水縣北三十五里瀨渚筆乘云一峰

崛起聳拔特立淮水遶其前遙望蔚然深秀

鎮山在高淳縣東北一里縣志云高淳古鎮也山

因以名自石臼湖迤邐而來濱於固城縣治在焉

學山在高淳縣東一里先為朝元觀後建儒學因

名

大遊山在高淳縣東三十五里欲雨上出雲氣頂
建北極廟南有石牛古蹟

遊子山在高淳縣東四十里金陵志云山周十里
上有石壇舊傳孔子適楚經此

遮軍山金陵志云高五十五丈周二十二里在高
淳縣東五十里山北有水入固城湖湖濱有畫舫
山與此山並峙

城門山在高淳縣東五十里又荆山在縣東六十里

木城山在高淳縣東六十里縣志云突起平地甚奇峻昔紅巾之亂民樹柵其上守之因名相近有饒山有泉水旱不涸

秀山在高淳縣東南三十里金陵新志云西南有水下注平陸舊傳有仙過此以鞭畫路形如之字四面皆應今四之字見存山上松柏旋伐旋生亦

異驗云

花山在高淳縣東南四十里上產白牡丹名曰仙
花舊傳有看花臺

大山在高淳縣南六十里其水北流入固城湖

鳳凰山在江浦縣治後相傳有鳳凰集此因名又
名曠口山岡嶺迴環與定山西華龍洞諸峰綿亘
數十里為一邑屏障南望長江右有泉名清惠

平山在江浦縣浦子口東門外二里大江奔注此

山適當其衝壁立千尺其上有平山閣

陰陵山在江浦縣南五十里舊志云相傳項羽迷

失道處

四潰山在江浦縣西南七十里舊志云項羽從二

十八騎走東城至此為漢兵所圍羽依山為陣潰

圍奔烏江因名石上有馬迹一名四馬山以上二

山亦見和州

馬鞍山在江浦縣西十里列嶂若屏其巔有飲馬

池冬夏不竭山後有觀音洞

西華山在江浦縣西十五里縣志云峰巒巍峙特冠羣山有蓮華峰丈人石藏雲塢北澗南澗玉井泉諸勝為邑之最

龍洞山在江浦縣西二十五里西接天井東連西華馬鞍定山綿亘甚遠怪石巉巖中有石洞相連洞中產龍禱雨多應

天井山在江浦縣西三十里龍洞山之西上有石

罅深不可測

東龍山在江浦縣西四十五里縣志云上有祈澤壇清泉白石林壑幽美唐張籍讀書處尚有遺址對峙者有西龍山又縣西六十里有翠雲山

福龍山在江浦縣東北十二里一峰陡聳俯闞大江南北如出牖下怪石巉巖中饒巖洞上有龍池冬夏不竭陳廷策記云上徑仄陡忽轉平行為玉虛觀納光激景神居福地於斯為勝

定山在江浦縣東北二十五里以北屬六合有獅子峰達摩宴坐石珠泉諸勝明莊文節景居此其右有玉屏山平行可坐千人眺矚甚遠

六合山在六合縣南六十里即江浦定山也有寒山獅子石人雙鷄芙蓉妙高六峰對峙環合縣以此名按江浦縣明洪武九年析六合縣滁和二州置今五峰在縣境唯獅子峰入江浦境中山多泉石巖壑之勝

宣化山在六合縣南六十里有宣化鎮按六合縣志載嘉定志云晉安帝置秦令於六合宣化鎮舊志據之而改秦令為秦郡以六合故棠邑安帝改為秦郡也然宋書志有秦令元嘉六年以臨涂併秦即六合之地況鎮名宣化冠以六合則六合何名若是縣名則名從隋始詳考通鑑隋紀晉王廣帥大軍屯六合鎮桃葉山張舜民曰桃葉山即今瓜步鎮之境唐季又有六合鎮將張約則是瓜步

鎮又名六合鎮宋史云張浚議築宣化城即宣化鎮地理通釋吳氏曰大江之南十郡之間其要不過此渡下流最緊者建康之宣化本六朝鎮戍之要地當是嘉定志云六合宣化二鎮傳寫脫二字也

桃葉山在六合縣南六十里舊志云隋伐陳詣冶山祇垣寺問解脫禪師何以克陳對云乘桃必克乃造桃葉舟渡江息此山傍故名

晉王山在六合縣南六十里府志云舊有晉王城相傳即隋伐陳時晉王廣所築山之西為宣化山瓜步山在六合縣東南二十里陸游入蜀記云瓜步山蜿蜒蟠伏臨江起小峰頗巉峻絕頂有元魏太武廟前大木可三百年一井已智傳以為太武所鑿不可知也太武以宋文帝元嘉二十七年南侵至瓜步鑿瓜步山為蟠道於其上設氍廬大會羣臣疑即此地周世宗伐南唐齊王景達自瓜

步渡江距六合二十里設柵亦此地也

小帆山在六合縣東南四十里寰宇記云即小石山也大江中流矗起石峰參天若張帆然又以白石如礬俗呼礬山上有落帆將軍廟又名石帆舊志云山北有出佛洞山之東即黃天蕩江流至此甚險今則洲生江狹稍為安瀾矣

赤岸山在六合縣東南四十里寰宇記云山高十二丈土色皆赤臨大江故名晉郭璞江賦鼓洪濤

於赤岸羅含詩赤岸若朝霞杜甫山水圖歌赤岸
水與銀河通王維詩帆映丹陽郭楓攢赤岸村皆
指此

靈巖山在六合縣東十五里嘉定志云山無銳峰
巖巒層聳四面如一邾滂以為巖峻常有靈瑞故
名有偃月巖蔡老人洞龍王泉鹿跑泉瑪瑙澗

方山在六合縣東四十里四面平正故曰方山宇
文周置方州梁建寺其上曰興雲古樂府云聞歡

遠行去相送方山亭即此地也

橫山在六合縣東北三十里山形平望若橫與江寧縣南橫山頗相類故亦名橫山府志云元魏於此置橫山縣山陽有禪證寺即梁昭明讀書堂也馬頭山在六合縣東北三十五里山峰雄秀絕頂一石高丈餘中一穴水清而不竭莫測深淺世傳有龍居焉

苻融山在六合縣東北三十五里嘉定志云苻融

嘗城此因名俗作芙蓉城距五里有塢山

冶山在六合縣東北五十里府志云巘九十九
峰跨六合天長二縣相傳吳王濞冶鑄處今上有
漢鑛鞬將軍廟蜀岡自此始

白土岡在上元縣東北十五里北連鍾山南接秦
淮其上色白故名隋書云賀若弼於此擒蕭摩訶
國朝順治十六年總督郎廷佐大破海寇於岡下

金陵岡在上元縣西北龍灣路上金陵新志云秦

厭東南王氣鑄金人埋於此後莫知所在

落星岡在江寧縣西南三十里一名落星墩南齊書云陳顯達平旦以數千人登落星岡新亭諸軍遁還又唐李白金陵江上遇蓬池隱者詩自注云時於落星石以紫綺裘換酒為歡按落星石在此岡之下明焦竑落星岡懷古詩樓堞新亭戍山川自昔多曾聞沽酒客一著綺裘過可兩證也

土門岡在江寧縣聚寶門外長千里即宋楊邦乂

殉節處今有褒忠祠及剖心處三字石碣墓在岡上

石子岡一名石子墩在江寧縣南十五里吳志云建業南有長陵在石子岡孫峻害諸葛恪投於此輿地志云宋大明中起觀風亭於上云即新亭岡古送行處按石子岡有三西岡在安德門外與白楊路近東岡雨花臺下梅岡是也中岡乃諸葛恪所投處即城南之鳳臺岡

大鳳岡在溧水縣西五里舊志云春秋時有鳳凰飛至此岡故名或傳大為待

桃花岡在高淳縣東南十五里上有九十九墩

蜀岡在六合縣東北三十里南接儀徵東連江都綿亘數十里一名崑崙岡鮑照蕪城賦云軸以崑岡即此蓋六合為蜀岡之首而蕪城其尾也

黃悅嶺在江浦縣北十五里縣志云兩峯高聳石脊連亘地號險阻明初始鑿山開路遂成南北孔

道

駱駝嶺在江浦縣東北二十五里定山之北重山
複道石磴崎嶇東葛城達浦子口必經此地為大
江以北門戶

燕子磯在上元界觀音門外磴道盤曲而上丹崖
翠壁凌江欲飛絕頂有亭能攬江天之勝

聖祖仁皇帝南巡屢幸此附明呂柟遊燕子磯記

己丑二月壬子

崇選陸伯載及子同遊燕子磯登弘濟寺寺西則
觀音巖也怪石礧垂蒼黛參差上接雲霄而大江

自龍江關西來直過其下觀音閣亦傍巖下就江
湑築基上又豎九柱皆丹柱上棚棧構閣閣三面
皆欄杆憑之瞰江若在樓船頂立也是時晴見萬
里日映碧流江豚吹浪上下西望定山如蛾着東
指瓜步如丘垤他山皆閃閃冥冥如落鴈蹲鴻不
可辨矣昔予在解州嘗遊龍門眺砥柱登流丹亭
汲河烹茶以弔禹墳至此乃勃然興懷將天下奇
觀尚有過斯二者乎閣東厓有白巖喬公篆書刻
石上而子崇伯載至乃復同升閣上流覽歎賞列
席懸巖上對江而酌酒肴既行卒爵欲往遊燕子
磯乃招二篙師泛舟行至觀音港登漢壽亭侯廟
先至水雲亭其扁為予友景前溪書精采如神乃
面江小坐遂上謁漢壽亭侯祠左有大觀亭亦前
溪書至此看江日隱斷雲烟霞霏微蒼茫無際矣
遂攀松捫蘿以上燕子磯磯皆巉石壘起水圍三
面其石罅猶見江轉磯底可以高覽八極也乃坐

中磯道士曰五七年前江衝磯前深不可測自立
關廟後水頗遠磯而去今南徙磯東數百家矣二
君皆補和前詩子崇又命行酌興酣北望泰山東
瞰滄海瀨氣縈迴靈光掩映不知此身之在天地
也間

赤石磯在江寧縣東南城外長河東來有赤石
枕中流居人競種石榴花每盛夏時緣堤岸燦若霞
錦為畫舫歡遊之所

華陽洞在句容縣茅山泉洞記云洞內東西四十
五里南北三十五里四郭上下皆石空懸百七十

大陰路所適七塗九原四方交通五門闔闢小徑
阡陌不計也飛鳥交橫風雲翕鬱原阜壠堰草木
水澤與外無異所謂第八洞天以此

青龍洞在句容縣茅山洞前多怪石奇秀森列流
泉歷旱不竭乾道志云洞口纔二尺餘僅可容人
偃僂而入其中平廣深不可測與諸洞暗通洞外
大石有窪處狀如人跡俗呼仙人跡

大江金陵志云府城在大江東南自府西南一百

十里之慈姥山至府東北之下蜀岡凡二百餘里
一名揚子江江乘記云大江自縣西一百二十里
承當塗分嘴浦上田為界紆迴二百九十三里與
和州烏江及揚州六合並分中流為界西引蜀流
南下交廣東會滄溟北達淮泗自大禹所鑿之迹
無不通焉吳錄云魏文帝至廣陵臨江觀兵權嚴
設固守帝見波濤洶湧嘆曰固天所以限南北也
遂歸胡三省通鑑注云江水東流自武昌漸漸向

北蓋南紀諸山所迫陂池之勢漸使之然也至於
江寧江流愈北建康當其下望歷陽壽陽皆直西
故建康謂歷陽皖城以西皆曰江西而江西亦謂
建康為江東建康謂采石為西州京口為北府皆
地勢然也府志云今府境之江南岸上自慈姥浦
下至下蜀港二百里而遙北岸上自浮沙口下至
采溝不及二百里江之支流旁出者大曰河小曰
港曰溝曰渡石激水曰磯水中可居者曰洲兩山

間曰夾縈迴曰套水所注曰浦江流南北遷徙今昔迥殊異時江泊石頭後徙而北今又漸南然尚去石頭十餘里茲志其可知者自慈姥浦而東下為鎌刀灣為烈山港有磯突出湍間名亂石磯又東北即白鷺洲其南岸曰犢兒磯上接江寧浦口下為大勝河自大勝河以東有水數曲曰響水溝燈盞溝上新河中新河下新河皆瀕江要地其北岸則芝麻河穴子河王家套八字溝皆列墩瞭望

處也又有洲曰長洲白沙梅子句容秀才火藥等洲皆在江浦境南岸自下新河而東為草鞋夾其外為道士洲上有屯駐處曰江心營近南曰護國洲中口洲自道士洲直抵北岸為浦子口又東以達於瓜步其濱江諸洲曰攔江曰工部官洲老洲柳洲趙家洲曰匾擔洲洲東為匾擔河其北即滌口河也江流至此亦曰宣化漾有洲亦名新河其下為礬山山屹立中流石色白類礬故名又數里

為西溝近黃天蕩為東溝二水自江出皆折而西
與儀徵縣接六合江盡此矣南岸中洲口而下有
山踞江而出者曰焦家背又東曰觀音山水曰觀
音港港口聳石下瞰江水曰燕子磯歷濤山唐家
渡袁家河東陽港遂接黃天蕩中有洲屬上元縣
其上為草場自龍潭而東洲渚限隔有斜臈洲太
子洲洲外為老鴉夾又東為天寧洲皆句容界其
支水分流曰白家溝楊家港雙溝港羅泗港而邪

溝尤為津要自此而東遂與鎮江接此近時江道之可紀者也

珍珠河在府北宋行宮後金陵志云陳後主泛舟遇雨水生浮漚宮人指為珍珠因名通護龍河南唐築城後惟西北僅存

護龍河在府東北宋鑿即舊子城外三面濠也府志云在上元縣治東北引而南合於青溪今堙廢
逾半

靖安河在府東北靖安鎮宋吳聿記自金陵抵白沙江流曠數百里波濤洶湧其尤者為樂官山李家漾宣和六年發運使盧公得古漕河於靖安鎮之下缺口取徑道於青沙夾取北岸穿丹月港由港尾越北小江入儀徵新河以易大江百有五十里之險以上俱上元縣

新開河在府治西南韓世忠碑記云宋建炎四年開自三山橋歷石城定淮諸門由草鞋夾以達於

江即下新河也

新河在府西江東門外五里通大江曰中新河又名直江口設關防禦稍南出大江曰上新河以通市舶以上俱江寧縣

胭脂河在溧水縣西十里府志云其地有胭脂岡因名明初命崇山侯李新鑿石穿流通蘇浙糧運於此

胥河在高淳縣東南四十里縣志云春秋時伍員

伐楚鑿河由鄧埠抵廣通鎮因名

澄溝河在高淳縣西三十五里宣水由此入蕪湖
太平近宣岸水濁此水獨清

浦子口河在江浦縣東二十里源出定山由浦子
口西入江

沙河在江浦縣東三十里府志云宋天禧中范仲
淹領漕事以大江風濤之險開此河引江水支流
下至瓜步入江即六合縣之長蘆河也按宋會要

天聖三年發運使張綸請開真州長蘆口河屬之
江與志異

後河在江浦縣西北三十五里源出廬州舊梁縣
至縣境茅塘橋出瓜步府志云即滁河之下流也
冶浦河在六合縣東三里自治山流入與滁水合
滁河在六合縣西南源出廬州舊梁縣經滁和界
流入東南三十餘里至瓜步入江滁古作涂通鑑
辨誤吳作堂邑涂中竭令涂中之水以為塘也今

滁州之全椒六合古堂邑地三國時謂之涂中又
北齊太建五年於秦郡置秦州州前江浦通涂中
唐滁州六合縣即其地

後湖在府北二里即玄武湖南史元嘉二十三年
築北堤立玄武湖於樂遊苑北宋史河渠志云知
昇州丁謂言城北有後湖往時給為民田凡七十
六頃出租錢數百萬蔭溉之利遂廢今欲迹舊制
復治岸畔疏為塘陂以蓄水使負郭無旱歲詔從

之六朝事蹟吳寶鼎元年開城北渠引後湖水流
入新宮今城北十三里有古池俗呼為後湖是也
丹陽記云後湖一名練湖晉元帝時為北湖肄舟
師於此宋元嘉中有黑龍見改為玄武湖又名蔣
陵湖秣陵湖習武湖及昆明池飲馬塘放生池諸
名吳宋皆嘗引其水以入宮牆苑園南唐近事云
周迴四十里山川掩映如畫六朝舊迹多出其間
明初貯天下圖籍於湖中洲上附明計宗道過後

湖記

天下版籍盡載時後湖南京戶部官率歲一往磨勘正德壬申秋予叨職寄斯役自八月

至十月始訖事凡過湖必出太平門命舟行可七八里許一望渺漫光映上下微風播揚文漪聿興蕩漾烟波之上莫不情暢神爽若遊仙焉予間立顧其嵯峨霄漢之表王氣鬱蔥而峙乎東南者鍾山也壘連如屏如幃在西北者幕府山也巖嶺偃蹇盤伏於地而松森其上者覆舟山也挺拔而凸出城頭殿角參差浮岡聳空者雞鳴山也山東西一帶列如懸榜者世傳臺城也峻增冒水而出者島嶼也傍視三法司隱隱錯落雲水之渚重岡疊阜遙連於其外巋然而鸞鳳峙騰然而蛟龍走矣其中遠近芳洲相聚如五星紅紫烟花畢絢如匹錦鷗鷺鳧鶩飛載飛載鳴鱗鱮鯉鯉以潛以泳則已目飮而心怡矣忽驚風暴作洪濤舂撞萬人惶懼挈舟賊岸而行經敗荷聞香氣猶襲人浮藻亂葺

牽舟綴楫乃引入曲渚兩岸蒼蔚須臾抵小陂遂
捨舟以涉焉命隸翦荆分莽排霧穿雲逡巡而進
見數處頽垣廢址意前朝遺跡令人慨歎而叢林
蒙翳追探前路尚空衆共憊焉或藉草坐茵箕踞
少憩復乃望一高丘隸指曰此相傳郭仙墩也衆
狙獫以上四圍樹林蔽日復下故道向新建冊庫
過石橋延佇其上騁望雲水茫茫清颺颯颯遂相
與攜手入舊庫之洲攝齊而升玄武廳則黃門趙
君惟賢已先渡見予輩殊訝既而聞述所遇則又
曰是何奇也予往反數矣而未有若諸君所遇者
衆亦相與慰喜以為非因風之故則誰使之一探
此奇哉凡以事晨至及暮而歸則見日光射水晚
霞相蕩回視湖上諸宇在蒼烟杳靄間不啻蓬萊
閬苑然豈不信為勝地哉昔歐文忠公以金陵錢
塘山川人物之盛各為一都會錢塘莫美於西湖
金陵莫美於後湖固遊治之所趨也我皇祖奮出

江表收天下版籍建庫而儲之於此特設科部官
司之禁非公遣不得至則凡好遊者雖慕幽遐瑰
瑋之觀無因可及而吾儕今獲因公而
至而又探奇於無心之會豈非至幸哉

國朝余賓碩玄武湖詩序

建康實錄云吳寶鼎二年開
城北渠引後湖水流入新宮

丹陽記云後湖一名練湖一名蔣陵湖徐爰釋問
云本桑泊晉太興三年始築長堤以壅北山之水
又名北湖宋元嘉中黑龍見立三神山於湖上更
名玄武湖孝武大明中肄舟師於此亦謂之昆明
池復於河側作竇通水入華林園天淵池南唐邇
事云金陵城北有湖周迴數十里一日馮謚舉玄
宗賜賀監三百里鑑湖曰余非敢望此但得賜後
湖亦暢平生也徐鉉曰主上尊賢下士常若不逮
豈惜一後湖所乏者知章耳熙寧八年王安石奏
廢為田開十字河立四斗門以洩湖水跨湖為橋

以通往來歲久湮塞今所存者十分之二耳明初置庫於湖中以貯宇內版籍今廢洲傍有小丘名郭公墩或云郭璞葬此

太子湖一名西池又名樂遊池在府北六里吳宣明太子所創晉明帝為太子修西池養武士於內張陣湖在府治西北石頭城後府志云相傳晉軍與蘇峻戰處

穩船湖在府治西北金川門外府志云明初引江水瀦以泊舟

半陽湖在府東北四十里一名半湯泉南徐州記
云水同一壑而冷熱相半民引熱水溉稻一歲再

熟以上俱上元縣

莫愁湖在府西三山門外相傳盧莫愁居此因名

附明顧起元莫愁湖考

江左今有莫愁湖在西城南按古樂府有莫愁樂石

城樂唐書樂志曰石城有女子名莫愁善歌謠石城樂第二歌云陽春百花生摘插環髻前挽指躡
忘愁相與及歲年莫愁樂云莫愁在何處莫愁石
城西艇子打兩漿催送莫愁來尚未詳也莫愁盧
家女子善歌唱嘗入楚宮李商隱詩如何四紀為
天子不及盧家有莫愁是也莫愁村今在承天府

漢江西石城在州西北晉羊祜所建鄭谷詩石城昔為莫愁鄉莫愁魂散石城荒江人依舊棹解艫江岸還飛雙鴛鴦王橫詩村近莫愁連竹塢人歌楚些下蘋洲又沈佺期詩盧家少婦鬱金堂即此也按通考載梁武帝詩洛陽女兒名莫愁云莫愁盧家女洛陽人則莫愁又有兩人矣

三城湖在府西南七十三里龍口山下湖中舊有三小城因名

婁湖在府東南十五里輿地志云吳張昭所鑿昭封婁侯因名宋時築為苑南史云沈慶之有園舍在婁湖一夜攜子孫徙居之以宅還官陳書紀云

太建十年立方明壇於婁湖以上俱江寧縣

絳巖湖在句容縣西南三十里一名赤山湖府志云吳赤烏中築赤山塘引水為湖歷代修築唐天寶時改為絳巖唐書地理志云麟德中令楊延嘉因梁故隄置後廢大厯十二年令王昕復置周百里為塘立二門以節旱潦

江城湖在句容縣西北六十里

丹陽湖在溧水縣西七十里高淳縣西南三十里

府志云湖周一百九十五里東連石臼園城二湖
其源有三出徽州府黟縣者為舒泉出廣德州白
石山者為桐水出溧水東廬山者為吳漕水俱匯
合於丹陽湖分二流一西出蕪湖一北出當塗姑
孰溪俱入江

石臼湖在溧水縣西南四十里高淳縣西二十里
西連丹陽湖府志云一望渟泓中有軍山塔子山
馬頭山雀壘山

固城湖在高淳縣西南五里西通石臼丹陽二湖
與當塗宣城分界湖水舊由宜興入太湖後築五
壩遂與太湖隔

秦淮在府治東南相傳秦時所鑿丹陽記云秦鑿
金陵方山斷處為瀆即今淮水經城中入大江是
曰秦淮建康實錄云秦淮水舊名龍藏浦有二源
一出句容華山南流一出溧水東廬山北流合流
於方山埭貫城中西注大江其水經流三百里地

勢高下屈曲自然不類人功疑非始皇所鑿也孫
吳至六朝都城皆去秦淮五里吳時夾淮立柵十
餘里史所稱柵塘是也梁天監九年新作綠淮塘
以防漲溢又作兩重柵皆施行馬自石頭至方山
運瀆總二十四渡皆浮航往來亦曰二十四航楊
吳時改築金陵城乃貫秦淮於城中

橫塘在府治東南金陵覽古云吳大帝自江口綠
淮築堤謂之橫塘左思吳都賦所云橫塘查下樓

臺之勝天下莫比者也自橫塘而北接於柵塘即

今秦淮逕口矣

以上俱江寧縣

青溪在府治東七里南史作清溪建康志云青溪水發源於鍾山接於秦淮逶迤九曲有七橋跨其上建業實錄云吳赤烏四年鑿東渠通北塹以洩玄武湖水逶迤十五里名曰青溪自楊吳城金陵青溪遂分為二今自竹橋西入舊城城濠者乃從潮溝西南流之故道自舊內旁南流經淮清橋入

秦淮者城中所存之一曲也

長溪在府東南六十里丹陽記云湖熟前有長溪
受句容赤山湖水入秦淮

梅花水在府治北觀音門內興善寺源自石罅中
出

烏龍潭在府治西北石城門側潭畔園林環列亭
榭參差為遊覽勝處府志云相傳有烏龍見故名
下蜀港在府東北百里一名官港以上俱上元縣

大城港在府治西南府志云合板橋新林等浦水由大勝關入江為江流險阨處旁有隴阜亦曰大

城關

蔡洲在府西南十二里府志云蔡洲周迴五十三里一名蔡家溼其別者為張公洲通鑑晉咸和五年陶侃舟行直抵石頭至蔡洲胡三省注云蔡洲在石頭西岸又梁承聖元年王僧辨督諸軍至張公洲注云張公洲即蔡洲

白鷺洲在府西三里與新林浦相對宋曹彬破南唐兵駐於此建康志云秦淮源出句容溧水兩山間合流至建康之左分為二支一支入城一支繞城外共夾一洲曰白鷺太白所謂二水中分白鷺洲者也府志近以三山門外西關中街水環繞處當為白鷺洲蓋沿襲舊名非其地矣

烈洲在府西南七十里以在烈山下名內有小河避風泊舟以上俱江寧縣

蟹浦在府西北十六里輿地志云白下城西南有蟹浦源出鍾山北流九里入江齊崔慧景軍敗單騎走蟹浦是也

江乘浦在府西北十七里史記云秦始皇東遊還過吳從江乘渡即此其浦發源石城山東入江舊因為縣名

白社浦在府東北二十五里金陵故事云發源鍾山西注秦淮一名鍾浦以上俱上元縣

新林浦在府西南二十里宋開寶中曹彬破南唐
兵於新林浦即此水經注云江水經三山又湘浦
出焉水上南北結浮橋渡水故曰版橋浦江又北
經新林浦輿地志云梁武帝從新亭鑿渠通新林
浦胡三省通鑑注建康府城西南江寧鎮北有版
橋市其地與新林相近謝朓所云新林向版橋張
舜民曰出秦淮西南行循東岸行小夾中十里至
版橋店建康寶錄云新林南上十里至孫林又南

上十里至版橋

查浦在府西石頭城南十里大江南岸建康實錄
云晉陶侃屯查浦李陽與蘇逸戰於查浦盧循犯
建業宋武帝柵石頭斷查浦以拒之皆此浦南上
十里即新亭

秣陵浦在府南五十里輿地志云浦以縣名源出
竹堂山北流八里入葛家湖又十里入長溪合於
秦淮

江寧浦在府南七十五里府志云源出當塗縣界
長三十里經故江寧縣入大江南史云侯安都襲
破齊兵於江寧浦口是也

蘼蕪澗在府治東南青龍山南唐故事云齊處士
劉瓛居此為儒林之宗年四十未婚其友為娶王
氏乃就澗折蘼蕪而去

躍馬澗在府南五里一名南澗宋有南澗樓以上
俱江寧縣

芳草澗在六合縣東水入冶浦河

瑪瑙澗在六合縣靈巖山下石有五色瑩秀可愛
桐樹灣在府東秦淮上鎮淮橋東舊植桐樹甚繁
因名宋人稱為桐林

汝南灣在府東八里當秦淮曲折處晉汝南王渡
江家於此

運瀆在府治西運瀆志云吳赤烏三年使左臺御
史郗儉引秦淮抵倉城以通運道今斗門橋南乃

秦淮入運瀆處經太平橋與青溪合

湖溝在府治西客座贊語云吳赤烏中鑿湖溝以引江水連青溪南抵秦淮西通運瀆北接後湖今舊內城下流入竹橋者其故迹也

以上俱江寧縣

河子溝在六合縣東南二十五里舊名急流江宋淳熙初所開新河之下流入於江

珍珠泉在江浦縣東北二十里定山西南山麓其地有泉噴出若散珠遂以為名東流入於江

湯溝泉在江浦縣北三十里駱駝峯北流入三义

河達於江

附

明陳沂金陵諸水圖考

金陵在大江東南自慈姥

山下至蜀渡古稱天塹臣浸之境也秦鑿淮吳鑿青溪運瀆楊吳鑿城濠宋鑿獲龍河宋元開新河同朝開御河城濠今諸水交錯互流文脈靡辨據經考之自方山之岡巽雨漑北流西入通濟水門南經武定鎮淮飲虹三橋又西出三山水門沿石城以達於江者秦淮之故道也自太平城下由湖溝南流入大內又西出竹橋入濠而絕又自舊內旁統出清橋與秦淮合者青溪所存之一曲也自陡門橋西北經乾道大平諸橋東連內橋西連武衛通濟城內旁納秦淮又自通濟城外與秦淮分流繞南經長干橋至於三山水門外與秦淮復合者楊吳之城濠也自昇平橋達於上元縣後至虹

橋南接大市橋者護龍河之道跡也自三山門外
達於草鞋夾經江東橋出大城巷與陰山運道合
者皆新開河也東出青龍橋西出白虎橋至柏川
橋入濠者今大內之御河也若城外落馬澗諸水
不能悉
載馬

江南通志卷十一

欽定四庫全書

江南通志卷十二

輿地志

山川 二 蘇松二府

蘇州府

陽山在府城西北三十里一名秦餘杭山一名萬安山一名四飛山以四面視之勢若飛動也顧元慶新錄序云去城三十里蟠巖特異以其背陰面

陽故曰陽山大峰十二箭闕最高戰國策云越王
以散卒三千禽夫差於干隧今萬安山有隧山即
其地也箭闕下有文殊寺白龍塢嶺西有龍母塚
前有龍湫白龍廟在焉東北有白鶴山以丁令威
宅名山有白塔可用巧漫潔白如粉唐時歲以供
進故亦名白塔山東北過金芝嶺曰管山山北大
石湧出如蓮花下有雲泉西為陽抱山西北為彭
山北為雞籠山甌山東南有象山即福壽山又徐

侯山在陽山西北十里一名卑猶吳越春秋云越王以禮葬吳王夫差於卑猶即此東南過鳳現嶺為鳳凰山又南為賀九嶺相傳吳王登此賀重九壁有賀九嶺三大字

高景山天平支隴也越絕書作高頸山其西麓對花山厓谷盤拱處曰金盆塢宋魏了翁墓在焉其南為斜堰嶺

金山亦天平支隴也初名茶塢山晉宋間鑿石得

金易今名有石梁橫架兩壁脈理不聯無所根蒂
其下空洞通人行或以為類天台石梁山故多美
石採之者衆近已殘毀

白豸山在府西北三十二里許墅之北按越絕書
舊名胥女山春申君封吳更名今名為白石山

以

上長洲縣

虎丘山在府城西北九里吳越春秋云闔閭葬此
以扁諸魚腸劍三千為殉越三日金精結為白虎

踞其上故名又曰海湧山絕巖聳壑茂林深篁為
江左邱壑之表初山踞平時中唐白居易始鑿山
麓引水四周溪流迴映綠山南一徑而入遂有遙
深幽邃之致其最勝者為劍池兩岸劃開中涵石
泉深不可測世傳秦皇鑿山求劍處也稍前為千
人石高下平行可坐千人神僧竺道生講經於此
有點頭石生公講經時聚石為徒石輒點頭因名
左有千葉白蓮池秦皇試劍石憨憨和尚泉清遠

道士養鶴湖陸羽石井泉東晉為王珣別墅山下
因有短簿祠劉宋何求兄弟陳顧越唐史德義並
憑此上有浮圖雲巖寺梅花樓小吳軒平遠堂仰
蘇樓五臺山千頃雲小竹林諸勝

聖祖仁皇帝南巡屢幸是山上建

行宮

萬歲樓

御賜匾額雲巖寺曰連雲梅花樓曰澹香樓山門曰虎阜

禪寺二山門曰路接天閭天王殿曰香界連雲大殿曰
仙景澄輝閣帝閣下曰雲光臺禪堂曰水雲深處

行宮內曰靜遠曰晴巒飛翠曰含輝山館

萬歲樓曰青雲鏡曰天光雲影又有

御書亭碑勒

御製虎丘山詩附梁顧野王虎丘山序

夫少室作鎮以峻極而標奇太華神

宇以削成而稱貴若茲山者高不崇雲深無藏影
卑非培塿淺異疎林秀壁數尋被杜蒨與苔蘚
枝千仞掛藤葛以懸蘿曲澗潺湲修篁蔭映路若
絕而復通石將頽而更縱柳巨麗之名山信大吳

之勝壞若乃九功六義之興依永和聲之製志由
興作情以詞宣形言諧於詒夏名文暢於鐘律由
來尚矣未有登高能賦而韜斐麗之章入谷忘歸
而忽鏗鏘之節故總轡齊鑣競雕蟲於山水雲合
霧集爭歌頌於林泉於時風清邃谷景麗修密蘭
佩堪紉胡繩可索林花翻灑乍飄颺於蘭皋山禽
嘒響時弄聲於喬木班班荆生礪石之上淮纓
濯足就滄浪之水傾縹流而酌香酒剪綠葉而賦
新詩肅肅若與三徑齊蹤緝然似共九

宋王禹偁

劍池銘并序

虎邱劍池泉石之奇者也吳地記引
泰王之事以為詭說考諸舊史則無

聞焉矧儒家者流不可語怪因為銘以解之銘曰
茂苑之側震澤之濼巖巖虎山沉沉劍池峻不可
以仰視深不可以下窺疑乎太極作怪化工好奇
水物設險山故忌危陷其泉也益取諸坎硤其石

也以象乎離艮有止兆蒙無亨期構此屯難成乎
險戰直恐夏后弗能導之豈惟秦王而能肇茲蓋
其始也一氣發泄兩儀分別爭融闢結擊搏而裂
斷壁雙揭摩雲不做翠秃青殘挫銳而中絕寒流
下咽奔山未決雪壑雷收拗怒而曲折颯東湍瀨
捋控洞穴翻翻成窟龍戰有血匪自人力蓋從天
設誰謂一拳登之維艱誰謂一勺挹之不竭
池竇自然劍何妄傳勒名山嶺破衆惑焉

尹山在府葑門外十八里

大姚山在府東南葑門外三十五里

張林山在甫里鎮離城五十里

周和山在府婁門外三里

白蠅山在府城東三十里

唯亭山在府城東三十五里

以上元和縣

玉遮山在陽山南橫列如屏今呼遮山舊志謂之
查山其南有案山化山苦竹山其北有蜀山東南
有貞山東有官山馬山又東為雅宜山本名雅兒
唐青州刺史張濟女雅兒墓此其南有朝山又東
則五城山又東則真如塢與小白陽相連

錦峰山在陽山西南山產異石霞駁雲燦宋兵部

尚書鄭起潛居此淳祐中理宗書錦峰二字賜之
鄧尉山在錦峰山西南去城七十里漢有鄧尉者
隱此其地為光福里故又名光福山北有龜山光
福塔在焉山之西北為虎山中通一溪跨以石梁
曰虎山橋其東麓有七寶泉鄧尉西行歷烏山觀
山朝山塢西磧山彈山過長旂嶺竺山至玄墓出
入湖山間居人愛植梅樹花開時數十里如積雪
諸山惟西磧最高大其旁又有鐵山吾家山石帆

山皆附鄧尉又馬駕山在鄧尉之陰又青芝山在

鄧尉西南羣山環拱中稍豁一隅致為佳勝附明

徐枋鄧尉十景記

虎山橋凡遊鄧尉者必由虎山橋虎山固鄧尉諸山之始也其

地四面皆山中匯二堰以受諸山之水廻環上下約二十餘里有石梁在亂山中雄跨二堰間層巒疊嶂映帶無已而左右巨浸波光極目正如長虹天橋橫亘碧落每一登眺不復知此身之在塵世矣余每謂鄧尉二堰實不減西子湖以其山水相得也然西湖諸山奇麗處正如子瞻所云淡粧濃抹猶能擬似若鄧尉二堰則如仙真勝流不可方物矣余酷愛鄧尉山水之勝一歲中嘗三四過之每至虎山橋輒徘徊不能去也司徒廟司徒廟柏千年物也雄奇偃蹇各極其致有非圖畫之所能

聖者殆不減杜少陵所咏孔明祠前柏也零落空
山榛莖滿地昔人祠宇湮沒無間多矣而此獨以
柏樹得傳不亦異乎或曰此漢高密侯祠也銅坑
道虎山橋為龜山龜山之麓直接平堤夾岸榆柳
皆在下堰中遙望水際有物如螺雞樹蒙之浮廟
墩也堰之盡長虹縹緲如綫銅坑橋也外則太湖
具區矣烟水滄漣山林杳冥而輕帆出沒直浮天
末亦一山之絕絕銅井鄧尉支山銅井最勝以其石
有泉也其頂高出諸山獨有二大樹冠之遠見三
十里石磴盤紆拾級而上既陟其巔有巨峰橫偃
大如十間屋其高幾丈嵌空峻峭作勢奇妙峰下
有泉二俱在石罅中石皆青碧色其質細潤如古
銅器而泉深如井故云銅井一云泉底有銅故水
味常溢要不可考也峰側有古廟居二大樹下廟
旁精舍三四楹坐臥食息與奇峰相對而烟雲出
沒皆在足底真殊境也石壁鄧尉諸山皆少奇石

故石壁雖在僻遠而遊履之所必到也先自平疇
躡山麓而上數折至山之半闕徑如砥夾路皆松
杉也上倚峻巖下俯太湖湖水瀟泮吞壑山足風
起則谷嘯水湧聲聞甚遠盤山而行二里許將至
石壁下又有一峰隔之再轉而入其徑最狹過數
武忽有平地周數畝上即石壁也石因避銅井之
靈妙而獨以雄峭作奇巖巖如削壁色正黃勢廻
抱當不減赤城矣中有精舍遊者至此必止息焉
橫山鄧尉看梅名勝處玄墓稱絕餘則馬家山董
墳朝元閣槎山磴上皆其選也然馬家山朝元閣
皆有梅花而無太湖山不得水其勢不奇礪上固
臨湖然一面取致曠而不深惟槎山則三面皆崇
山峻嶺復自平田中突起一小山山之麓直入湖
中登山瞰湖則遠水兼天一望無際而廻顧三面
凡巖壑壁塢蘿落叢薄幽深窈窕曲折層疊無非
梅也春日旣麗花光照眼正如玉波雪浪洶湧青

登碧嶽間自與澄湖萬頃爭奇矣七十二峰閣即丙舍也閣
顧文康墓在潭山之麓七十二峰閣即丙舍也閣
傍多長松巨石後有峭壁雄據閣背山面湖一望
而七十二峰之勝皆在目矣黛厓螺髻縹緲烟波
間吾不能為形容也西灣西灣在玄墓之西太湖
至此一曲故名西灣其地為鄧尉山中最僻處人
跡罕到而多隱者依山而村山家野店無不朴古
山多叢竹彌衍數萬亦諸山所無也余喜其地之
僻嘗遊息焉地在湖濱每中秋濤聲直薄於枕意
即唐張潮所詠之西灣也隔湖即鳳凰山云礎上
礎上亦名東灣以與西灣相對也多高崖拔起湖
中亦有平沙浮衍波面崖上下皆山家屋宇蘿落
井井行列屋後皆高山循山皆梅花數里中無雜
樹軒窓乍啓波光如射而蒹葭離披天水俱永直
移我情矣玄墓名勝志云吳之中惟玄墓最僻亦
最奇面臨險陬丹崖翠壁望之若屏又名鄧尉法

華障其前銅坑青芝迤邐其左遊龍界其右岡連嶺屬詭狀殊態不可殫述余以為此固仙山之所
有也未足盡其勝也若以梅花為香國迴環百里皆梅與山水相間此天下之山之所無也而尤奇者以漁洋為屏太湖為沼左右開障其整如列翁此種氣象苟非開法王座則何物足以當之勝國末萬峰和尚駐錫於此故玄墓亦名萬峰歷年三百皆之祇林覺路蕪沒於荒榛衰草中不可復問今剖和尚繼之而法席愈盛於是危樓傑閣遍滿山崖矣

國朝汪琬遊馬鞍山記

馬鞍山在光福鎮西與銅井並峙山中人率樹梅藝茶條桑為

業梅五之茶三之桑視茶而又減其一號為光福幽麗奇絕處也予入山與諸子循鄧尉之陰前行數十步輒有平原曲澗迴流倒影澄澈見底心稍喜於時遊人輿者騎者屣而從者不絕於道既

至山麓則其境益奇畧以短畦蒔以叢竹陰森蔚
蒼茂通小徑不能受輿騎率皆捨而徒步矣前後
梅花多至百許樹香氣翳勃落英繽紛入其中者
迷不知出稍北折而上望見山半累石數十或偃
或仰小者可几大者可席蓋爾雅所謂磬也於是
遂往列坐其地俯窺旁矚濛濛然惘然曳若長練凝
若積雪綿谷跨嶺無一不佳又有微雲弄白輕烟
綠青左澄湖以為境右崇嶂以為屏水天浩漾蒼
翠錯互然則極鄧尉玄墓之觀孰有尚於茲山者
抑惜乎地深且遠莫有治廬其址者故不能信宿
於此以窮其幽盡其變此則予之恨也
馬駕山不載郡志或又謂之朱華山云

玄墓山在鄧尉西南六里東晉青州刺史郁泰玄
墓此故名按姑蘇志引聖恩庵開山記玄墓作袁

墓上有聖恩寺丹崖翠閣望之如屏絕頂可攬全湖之勝康熙二十八年

聖祖仁皇帝南巡駐蹕寺中

賜御書松風水月四字其山陰與至理諸山相連直抵呂山西則孫家嶺諸山漸入於湖南為周山又法華山在玄墓山南一名鉢盂山三面皆在湖中峰塢幽閒遊者鮮至其東有橫山漁洋山與周山相屬彈山在西磧之左發迹湖濱橫亘六七里直接青

芝瀕湖處有七十二峰閣所據極勝

茶山一名繡裘山狀類土阜而通體皆石南去太湖不百步浮六小峰如翠螺搖曳水面歷歷可拾花山舊名華山一名天池山距陽山東南五里山石峭拔巖壑深秀續圖經云華山於羣山獨秀望之如屏或登其巔有石蓮花狀以此得名或云晉太康中曾生千葉蓮花也老子枕中記云吳西界有華山可以度難疑即此上有石屋二間四壁皆

鑿浮圖像又有虎跑泉蒼玉洞桃花澗洗心泉諸勝其南為鹿山西有清流山東南為隆池山

聖祖仁皇帝南巡幸此

御製詩刊於華山寺

恭紀首卷

支硎山在縣西十五里晉支遁嘗隱此山得道升雲而去蘇州志平石為硎山多平石故因支遁以支硎為號焉山有石室寒泉放鶴亭馬跡石別有南峰東峰等峰唐建支山院處南有三巨石屹立

如門下有觀音寺故亦名觀音山又定山在支硎
西相傳支遁創報恩寺於此禪定故名續圖經謂
支硎一名報恩山

天平山在縣西二十里方輿勝覽云巍然特高羣
峰拱揖郡之鎮也林木秀潤更多奇石有卓筆峰
飛來峰五丈石卧龍峰中子峰毛魚池大小石屋
盧志云山頂正平有望湖臺圓石而湖者曰照湖
鏡有白雲泉一線泉華蓋松又有穿山洞蟾蜍石

及龍門南趾有白雲寺范仲淹祖墓在焉其西有
管架峰其後羣石林立名萬笏林又仰天山在天
平西數里舊名馬鞍山宋范成大營墓於此慕仲
淹為人遂改今名天平之西又有寒山明處士趙
宦光鑿石為澗引泉為池山之勝境也附明高啓

遊天平山記

至正二十二年九月九日積霖既霽
灑氣澄肅予與同志之友治饌載醪

指天平山而遊焉山距城西南水行三十里至則
舍舟就輿經平林淺地間通傍竹石蒙翳有泉伏
不見作泠泠琴筑聲予欣然停輿聽久之而去至
白雲寺謁魏公祠憩遠公庵然後循其麓由狙代

以上山多怪石若臥若立若搏若噬蟠拏撐拄不可名狀復有泉出亂石間曰白雲泉綫脈縈絡下墜於沼舉瓢酌嘗味極甘冷泉上有亭名與泉同草木秀潤可蔭可息過此則峰迴磴盤十步一折委曲而上至於龍門兩岸並峙若合而通窄險深黑過者側足又其上有石屋二大可坐十人小可坐六七人皆石穴空洞廣石覆之如屋焉既入則慄然若將壓者遂相引以去至此蓋始及山之半矣乃復離朋散伍競逐幽勝予居前益上覺石益怪徑益狹山之景益奇而余之力亦益以憊矣顧後者不予繼乃獨褰裳奮步窮山之高而止焉其上始平曠坦石為地拂石以坐則見山之雲浮浮天之風颭颭太湖之水渺乎其悠悠予趨乎若舉泊乎若休然後知山之不負於茲遊也既而欲下失其故路樹隱石蔽愈索愈迷遂困於荒茅叢篠之間時日欲暮大風忽來洞谷嗒呀鳥獸鳴吼予

心恐懼俯下疾呼有樵者聞之遂相導以出至白雲亭復與同遊者會衆莫不尤予好奇之過而予亦笑其怛怯類取不能得茲山之奇絕也

秦臺山在太平山之右與萬笏林相隣相傳秦皇遊會稽嘗登此故名其南則羊腸嶺石為白羊山嶺南為赤山長可數里土石多赭色

小白陽山在府城西一名伏龍山左抱靈巖右帶穹窿前瞰太湖為吳中勝處舊有寄心庵今廢其東南為博士塢彌陀嶺竺峰嶺又東南則獅子巖

又南則野芝塢皆連屬靈巖山

胥山在府西三十里太湖口寰宇記云子胥既死
吳人立祠江上因名胥山下有九折路南出太湖
吳王所闢以望太湖者也按越絕書云闔閭之時
大霸築吳越城城中有小城二徙治胥山然則胥
山之名在闔閭時已有之矣未必因於子胥也

姑蘇山在府西三十里橫山西北一名姑胥一名
姑餘古姑蘇臺在其上司馬遷嘗云登姑蘇之臺

以望五湖即此

峯萼山在府城西南金山之東圖經云形如獅子故亦名獅子山也水經注以為峯嶺山吳地記云吳王僚墓此山南有大石相傳為墜星山右有土阜曰鈴山左曰索山皆以獅子名續圖經云山南有思益寺白居易嘗遊之今廢

何山在獅山北一里一名鶴阜山其地舊為鶴邑墟也梁隱士何求何點墓此故改今名

橫山在府西南十一里姑蘇山東隋書十道志云
山四面皆橫故名一名踞湖以其背臨太湖若箕
踞也續圖經云此山鎮郡西南臨湖控越吳時要
地隋開皇中嘗遷郡於橫山東以山為屏蔽周圍
甚廣環以佛刹如薦福楞伽寶華堯峰之類有五
塢芳桂飛泉修竹丹霞白雲也

堯峰山在橫山西南吳劉鳳記云堯嶺者記堯時
水所至也其高踰千仞蓋洪水汨原東南下卑其

勢必滔墊古有所識也烟霞瀰漫不辨晴雨有清
暉軒碧玉沼多景巖寶雲井白龍洞觀音巖偃蓋
松妙高峰東齋西隱十景今僅有存者上為聖壽
寺下為興福院康熙二十三年

聖祖仁皇帝南巡

賜翰林院編修汪琬

御書一卷因建閣於山西麓又西為鴨踏嶺嶺下為石塢
中產文石其南有寶華山長旗嶺其東有感慈塢

又東為吳山其南有桃花塢臨太湖白楊灣與吳江分界

楞伽山一名上方山在吳山東北上有浮圖東南麓有丁家山唐人丁公著父喪負土成墳故名其北為寶積山又北為吳王郊臺東北為茶磨山

黃山在茶磨山北四里胥塘之北諸峰高下相連俗稱筆格山周必大遊山錄謂有法雲寺及浮圖今皆無

靈巖山在府西南二十五里一名硯石山越絕書云吳人於硯石山作館娃宮即其處也續圖經云山西有石鼓故又名石鼓山登其巔俯瞰具區烟濤浩渺一目千里而碧巖翠塢點綴滄波之間誠絕景也續圖經云山頂有三池月池研池玩華池雖旱不竭昔吳王置離宮於此有琴臺館娃宮西施洞響簾廊吳王井遺蹟其石壁峭拔者為佛日巖平坦處有靈巖寺康熙二十八年

聖祖仁皇帝南巡幸此

穹窿山續圖經云在縣西南六十里兩嶺相趨名曰同嶺產自然銅又曰銅嶺越絕書云赤松子採赤石脂於此又神仙傳秦穆公魚吏赤鬚子食柏實石脂絕穀後往吳山升仙去即穹窿山也山高而平其頂方廣可百畝半山有泉名法雨可以灌田東嶺下有盤石高廣丈許相傳有朱買臣讀書臺其北有紫藤塢百丈泉

香山在府西南七十里北連穹窿山南近太湖為
胥口吳地志云吳王遣美人採香於此或云種香
處下有香水溪今名箭涇

洞庭西山在太湖中一名包山又名夫椒山漢書
云下有洞穴潛行水底無所不通號為地脈故謂
洞庭山道書以為第九洞天周迴百三十餘里重
岡複嶺縈洲曲澗諸峰無不奇挺而縹緲峰為最
高緣山擇勝名刹凡十有八而林屋洞毛公壇桃

花塢消夏灣崦裏諸迹尤著中涵綠野自成村聚
居人以桑柘橘柚為常產每秋高霜餘丹實與茂
林相差於巖壑間望之若金翠圖繪云林屋洞有
三門同會於一有金庭玉柱又有石鼓石鐘其聲
清越漢劉根於此學道以洞故一名林屋山西洞
庭之北曰橫山曰陰山晉陰長生煉丹處東為禹
期山或云禹會諸侯於此南有大雷小雷五湖賦
云大雷小雷湍波相逐又有金庭玉柱等山

洞庭東山亦在太湖中周六十餘里史記謂之莫
釐山相傳莫釐將軍居此盧志一名胥母山越絕
書云闔閭旦食於紐山晝行於胥母是也以洞庭
在西故今稱為東洞庭視包山差小而岡巒起伏
廬聚物產大畧相似論者謂稍遜西山之清潤云
其東麓曰武山本名虎山吳王養虎於此西南曰
三山有三峰相連昔有稱此湖為三山湖者以此
又有澤山厥山以上吳縣明王鏊洞庭雨

山賦并序

楚之湖曰洞庭吳之山亦曰洞庭其以相埒耶將地脈有相通者耶郭璞云包

山洞庭巴陵地道潛達傍通是未可知也而吾洞庭實兼湖山之勝始山特為幽人韻士之所棲靈

山佛子之所宅至國朝名臣徽爵往往出焉豈湖山之秀磅礴鬱積至是而後泄於人耶東岡子曰

山川之秀實生人才人才之出蓋顯山川顯之維何蓋莫過於文兩山者秘於古而顯於今其實有

待子無庸辭余曰然乃為之賦其詞曰吳越之墟有巨浸焉三萬六千頃浩浩蕩蕩如滄溟渤解之

茫洋中有山焉七十有二渺渺忽忽如蓬壺方丈之彷彿日月之所升沉魚龍之所變化百川攸歸

三州為界所謂吞雲夢八九於胸中曾不帶芥者也客曰試為我賦之夫太始沕穆一氣推遷融而

為湖結而為山爰為犀峰散見疊出於波濤之間或現或隱或浮或沉或吐或吞或如人立或如鳥

騫或如鼉鼉之睒或如虎豹之蹲忽起二峰東西
雄據有若巨君彈壓臣庶又若大軍之出千乘萬
騎狂幢寶蓋繚繞奔赴東山起自莫釐或騰或倚
若飛雲旋旋颺不知幾千百折至長圻蜿蜓而西遊
西山起自縹緲或起或伏若驚鴻翥鳳不知幾千
萬落至渡渚迴翔而北折試嘗與子登高騁望近
則重岡複嶺岷岫摩露紫洲枉渚蜃壇緬邈遠則
烟蕪渺瀰天水一碧帆影見而忽無飛鳥出而復
沒靈巖則返照孤稜弁山則輕烟一抹此亦天下
之至奇也若乃長風駕浪歛山欲野足使人魂驚
而汗駭及其風日晴熙殺紋漪漪又使人心曠而
神怡至於瑤海上月流光萬頃星河倒懸盪漾山
影又一奇也遙山霽雪凝華萬疊玉鑑冰壺上下
相合又一奇也風雨晦明頃刻異候烟雲變滅咫尺
殊狀雖有至巧莫能為像試嘗與子弔古尋幽
則有迴巖穹壑竊窅相通琳宮梵宇暮鼓晨鐘奇

藤靈藥美箭長松金庭玉柱石函寶書靈威火人
之所窺也貝闕珠宮繡毅鳴璫柳毅書生之所競
也翠峰杜圻范蠡之所止息黃村角頭綺皓之所
從逝也而閩閭夫差之跡尤多存者玩月之渚消
夏之灣牧馬之城圍虎之山練兵之瀆射鸚之壘
出金鐸於淺瀨逸梅梁於驚湍他若毛公燒丹之
井蔡經鍊藥之塚聖姑絕雄之塘雪竇降龍之淵
其石則炭萃嶙峋瘦漏嵌空牛奇章有甲乙之品
宋艮岳有永固之封其泉則困淪嚴沸甘寒澄碧
墨佐君表無礙之名天衣禪留悟道之跡斯地也
孫尚書欲卜居而不能范文穆思再至而不果豈
如吾人生長茲土依巖架棟占野分園散為村墟
渙為閩閩桑麻交蔭雞犬鳴吠里無郭解劇孟之
俠市無桑間濮上之音婚姻相通若朱陳之族理
亂不識若武陵之源佛狸之馬跡不到周顒之俗
駕自旋星應五車地絕三斑盧橘夏熟楊梅日殷

園收銀杏家種黃柑梅多庾嶺梨美張谷雨前芽
若蟄餘萌竹水族則時裏之白膾殘之銀魴鱸鮒
黃自昔所珍吾且與子摘山之藪投野之葺割湖
之鮮釀湖之醲泛白少傅月夜管絃之舟扣天隨
子太古滄浪之歌弔吳王之離宮叩隔凡之靈窩
凌三萬頃之瓊瑤覽七十二之嵯峨其亦足樂乎
彼岳陽彭蠡非不廣且大也而乏巍峩之氣天台
武夷非不高且麗也而無浩渺之容蓋物不兩大
美有獨鍾茲謂人間之福地物外之靈峰是固極
遊觀之美而未知造化之工且夫天地之間東南
為下非是湖為之尾間洩之緒之則汎濫橫溢江
左之民其為魚乎懷襄之世湖波震蕩非是山為
砥柱鎮之繞之則奔激暴嘯湖東之地其為沼乎
唯夫天作之寬以納以容地設之隘以襟以帶禹
順其流分疏別派三江既入萬世永賴而後吾人
乃得優游於此蓋至是而始知造化之意深神禹

之功
七十二峰記

太湖之山發自天目迤邐至宜興入太湖融為諸山湖之西北

為山十有四馬蹟最大又東為山四十有二西洞庭最大又東為四十有七東洞庭最大馬蹟兩洞庭望之渺然世外即之茂林平野閭巷井舍仙宮梵宇星布碁列馬蹟之北津里夫椒為大夫差敗越處也西洞庭之東禹期鼇山其北橫山陰山葉余長沙山為大長沙之西衝山漫山為大東洞庭之東武闕西驛山為大北上有居人數百家或數十家馬蹟兩洞庭分峙湖中其餘諸山或遠或近若浮若沉隱見出沒於波濤之間馬蹟之西北有若積錢者曰錢堆稍東曰大岷小岷與錫山若連而斷舟行其中曰獨山有若二鳧相向者曰東鴨西鴨中為三峰稍南大隋小隋與夫椒相對而差小為小椒為杜圻范蠡所嘗止也西洞庭之北貢湖中有兩山相近曰大貢

小貢有若五星聚曰五石浮曰茆浮曰思夫山有若兩鳥飛且止者曰南鳥北鳥其西兩山南北相對而不相見見即有風雷之異曰大雷小雷橫山之東曰干山紹山曰曠浮曰東嶽西嶽世傳吳王於此置男女二戲也其前為弼山云吳王銅囚者也有若琴者曰琴山若杵曰杵山大竹小竹與衡山相若物浮水面可見者曰長浮瀨頭浮殿前浮與龜山相對而差小者為龜山有二女娟好相對曰謝姑有若立柱巖薛者玉柱稍却金庭其南為岐山為歷耳中高而旁下者筆格驤首若逝者石蛇有若老人立石公石蛇石公石最奇與龜山龜山南北相對曰鼉山旁曰小鼉若螺者青浮二鼉之間若隱若見曰鷺藍東洞庭之南首銳而未岐者曰箭浮若屋欹者王舍浮苧浮又南為白浮澤蕨之間有若豈浮水而者蒟帽有逸於前後追而及之者貓鼠有若碑碣橫者曰石碑是為七十二

然其最大而名者兩洞庭也。蔡羽銷夏灣記山以水襲為奇水

襲之以水又襲之以山中函池沼寬周二十里舉天下之所無奇之奇銷夏灣是也。灣去郡城且百二十里春秋時吳子常從避暑因名銷夏自吳迄今垂二千年遊而顯者不過三五輩其不為凡俗所有可知。已湖之山莫大於包山山之峰莫大於縹緲峰高不知其幾里袤五十里有奇峰之南水道三十里為茗溪其弗能與茗溪參者諸壑抱其外也。茗之北舟行三十里以求縹緲峰其弗能與縹緲峰直者亦諸壑為之拒也。四面峰巒交萃獨以一面受太湖其中虛如抱甕其南列門闕焉。由門闕東西盼西為龍頭山其次為小洞庭為石蛇為舍為蕪為鼠鬪之石不得而名焉。東則大小明月灣為石公為澤為蕪為三山不得而名焉。明月灣其背為梭山厥土墳壚厥產林檎鴨脚櫻桃。

柚柿梨棗龍頭之背為圻村厥土白磔厥產玉石
盧橘當銷夏之腹印浮其上乍有乍無為衆安之
洲帆落洲上則四面環合為屏為翰聳妍效請以
與縹紗相拱峰之巔有草無木其麓多木無草丹
宮梵室蒙蔽林靄鐘鳴鼓應然後知仙釋之虛魚
行鳥過彤影交徹帆翔其上而莫之知避也夫天
地既異而處其僻信乎遊者之難至矣向使移而
置之附郭則撰壺觴秣車馬者日不暇給豈獨為
吾灣哉人將樵乎劍負以趨萬物失所矣夫造化
無慮者也設是灣如有意鬼神之能不得而與非
冥契其事孰能樂之嗚呼非惟世之人不得而樂
灣之人亦莫得而樂也余世居灣上有所獨得私
志

龐山在吳江縣東南三里其北即龐山湖

虞山在常熟縣西北里許虞仲居此故名海虞或
云海嶼亦名海巫又名烏目皆此山也雖無峰巒
而蜿蜒起伏畧如臥龍今縣跨山為城分踞巖壑
城內有仙人洞城外有拂水巖崖石陡峻水奔注
如虹凌風飛濺最為奇勝山陽有寶巖灣山陰有
桃源洞又有三沓石與石城石門諸峰錯峙下有
石壇

破山在常熟縣虞山北六里相傳龍鬪而山破故

金方里ノノ二二
卷十二
名上有鬪龍澗傍有硃沙洞放生池東北有空心
潭又有舜井

頂山在常熟縣破山北十二里上有齊女峰相傳
齊景公女葬此又有白龍池水簾洞南有烏目澗
皆虞山之別峰支嶺也

福山在常熟縣西北四十里俯臨大江與通州之
狼山相望境特雄本名覆釜唐改為金鳳五代吳
越改今名山麓有東嶽行祠

壽山在常熟縣西北四十里與福山相連北濱大江又名陶山

河陽山在常熟縣西北四十里一名鳳凰山高一百二十丈上有秀峰醴泉又有梁時古檜及唐狀元陸器讀書臺

志山在常熟縣與河陽山相峙按盧志居民鑿池得唐斷碑有鷲山之語則志當作鷲

塔山俗呼箬帽山在河陽山南晉處士夏統宣城

金天日... 卷十二

太守郇臻嘗居此

范山在常熟縣北三十六里相傳梁范冀兄弟居此故名

常熟山在常熟縣北三十七里本名銅官或云洞觀唐改今名

石家山在銅官山北

茯苓山在常熟縣西北六十五里下有龍潭石闌猶存相傳舊產茯苓故名

宛山一名苑山在常熟縣西五十里產石堅潤可為硯

顧山在常熟縣西北五十里連無錫江陰二縣界俗呼三界山亦曰香山

烏邱山在常熟縣東南二十七里去崑承湖三里或作塢山

秦柱山在崑山縣東南三十里按圖經秦柱山在海鹽縣東南三十里而寰宇記又云縣南三十里

有秦柱山又吳錄云一名秦望山秦始皇登此望
海故名盧熊志云今千墩寺佛殿有山高二丈者
是或以千墩去海甚遠雖陵谷變遷古今不一未
敢信其必然也又東山在縣東南車塘里宋范良
遂讀書築亭其上扁曰墨莊

馬鞍山在新陽縣西北廣袤三里高七十丈孤峰
特秀極目湖海上有慧聚寺又有華藏寺及浮圖
七級玉泉井大小石浮圖南有桃源洞北有鳳凰

臺西有一線天東有東巖又有紫雲巖桃源洞長
陽洞文筆峰始縣以崑山得名今崑山割隸華亭
縣界遂呼馬鞍山為崑山產玲瓏石康熙四十四
年

聖祖仁皇帝巡幸登文筆峰因建

皇殿於上

大海在昭文縣東百里自白茆港口而下為江海
交會處

三江一名三江口在府東南三十里舊說東江松江婁江皆自太湖分流今由吳江縣東北流經長洲崑山東入嘉定界者為松江一名吳淞江自吳縣北入運河經郡城東過崑山至太倉州境者為婁江唯東江不可考或以黃浦當之詳見河渠志以上係吳縣

姚城江在吳江縣東南三十里由松江分派以達於白蚘二江吞吐衆流經龜蕩入澱山湖凡三十

餘丈

大江在昭文縣北西接江陰之涸瀆浦東至太倉界之撐脚浦福山港居其中北對通州狼山最稱險要新江在崑山縣宋嘉祐間所開其西接松江南入陳湖北入鰻鱧湖又有四十二浦西北之陽城南之澱山湖水皆納焉

新洋江在新陽縣出自松江而流於橫塘通卜處浦大虞浦

吳淞江在新陽縣南九里

運河在震澤縣南自嘉興石塘北流經郡城為胥江為南濠又北繞白公堤出望亭入無錫界續圖經謂之邗溝按隋開江南河通龍舟以巡會稽即此河也

陽城湖在府東北二十里所納之浦凡十視諸湖蕩為大東為包湖傀儡蕩二水與陽城合而為一又東為巴城湖北為鰻鱧湖施澤湖

沙湖在府東二十里一名金沙湖湖雖小而與吳淞江諸水吞吐有青邱戴墟二浦以上長洲縣

澹臺湖在府西南十八里太湖之東史記云澹臺子羽南遊至江索隱注吳國東南澹臺湖即其故址吳地記以為子羽宅所陷自此東經寶帶橋入運河分流入黃天蕩及陳湖又東為獨墅諸湖又東為尹山諸湖

尹山湖在府東南二十里尹山市東北

漕湖本名蠡湖在府西北四十里寰宇記云范蠡
伐吳開蠡瀆通此故名其稱漕湖不知何始或以
其通漕運故也唐書地理志云元和八年孟簡開
太伯瀆并蕞蠡湖故以瀆為孟瀆湖為孟湖其實
古之蠡湖也其東有蠡口湖之西屬無錫而其浸
皆在長洲以上元和縣

太湖在府西南三十餘里禹貢謂之震澤周官爾
雅謂之具區國語史記謂之五湖其實一也越絕

書云太湖三萬六千頃水經注韋昭云方圓五百里踞蘇常及湖州三郡地中有七十二山居民環匝北有百瀆納常潤諸郡之水南有諸澗納天目宣歙諸山之水為東南巨浸楊修五湖賦云頭首無錫足蹄松江負烏程於背上懷大吳以當胷數言可作圖經也昔稱五湖多異說不足據然今亦有菱湖莫湖游湖貢湖胥湖五湖又有梅梁金鼎東皋里等名而統曰太湖其水由長橋口注松江

東入於海附明王鏊五湖記

吳郡之西南有巨浸馬廣三萬六千頃中

有山七十二襟帶三州東南之水皆歸焉其最大者二一自寧國建康等處入溧陽迤邐至長塘并潤州金壇延陵丹陽諸水會於宜興以入一自宣歙天目諸山下杭之臨安餘杭湖之安吉武康長興以入而皆由吳江分流以入海一名震澤書所謂震澤底定是也一名具區周禮職方揚州之藪曰具區山海經浮玉之山北望具區是也一名笠澤左傳越伐吳吳子禦之笠澤是也一名五湖范蠡乘舟出五湖口太史公登姑蘇臺望五湖是也五湖者張勃吳錄云間行五百里故名虞仲翔云太湖東通長洲松江南通烏程霅溪西通宜興荆溪北通晉陵滆湖東連嘉興韭溪水凡五道故謂之五湖陸魯望云太湖咸池五車之氣故一水五名然今湖中亦自有五湖曰菱湖莫湖游湖貢湖

胥湖莫釐之東周三十餘里曰菱湖其西北周五十里曰莫湖長山之東周五十里曰游湖沿無錫老岸周一百九十里曰貢湖胥山之西南周六十里曰胥湖外又有三小湖夫椒山之東曰梅里湖杜圻之西魚查之東曰金鼎湖林屋之東曰東皋里湖而吳人稱謂則惟曰太湖云爾

陳湖在府東南三十五里曠野之區接崑山縣界石湖在府西南二十里白洋灣所匯也界吳縣吳江之間有茶磨諸峰映帶頗為勝絕吳郡志云范蠡從此入五湖處宋叅政范成大居此孝宗書石湖二字賜之其東一溪北流橫塘曰越來溪與木

瀆水合出橫塘橋東入胥門外運河為胥江亦曰
胥塘北流閭門運河曰綵雲港自橫塘北入運河
曰洞徑胥塘之水又會為沙湓潭與虎邱山塘水
合曰射瀆相傳吳王嘗射於此亦名石瀆又北為
長蕩轉入婁江

胥口自太湖東出於香山胥山之間又東為木瀆
香水溪在焉又東與越來溪會曰橫塘以上吳縣

鮎魚口在吳江縣太湖之北北流經蠶塘入盤門

運河東至分水墩東流入長洲界為柳胥港即夾浦轉入澹臺湖南流入吳江縣界為龐山湖

龐山湖在吳江縣自分水墩南流入甘泉橋匯於此其下流為黎湖菱湖葉澤湖新湖葉湖之東為九里湖亦名同湖急水港杓頭潭清水蕩在焉

澱山湖在吳江縣界長洲崑山之間吐納東南諸水玉峰續志云湖屬華亭惟北岸隸蘇郡其北為范青漾為度城湖北入新洋江

汾湖在吳江縣一名分湖以分屬吳江嘉興也其東流入謝宅蕩蓴菜蕩南陽港又東通三泖入華亭界北入三白蕩

鶯脰湖在震澤縣西南其源自天目東流至荻塘會爛溪水併出平望匯於此以其形似鶯脰故名亦名鶯鬪湖又有震澤湖唐家湖蠡澤湖沈張湖並在縣治

崑承湖在常熟縣東南五里自無錫以東長洲以

北之水匯流於此

泮溪在震澤縣西南西受烏程諸水東分為橫古塘又東合於南潯荻塘會十四港以入於湖

白茆港在昭文縣東七十里自縣城內運河分流西合山塘尚湖崑承諸水東至沙營塘吳中諸水北流者皆由此以達於海宋明至今相繼修治詳見水利

許浦在常熟縣北七十里西接梅李塘會崑承諸

湖水以達於海宋孝宗時設水軍寨於此又黃泗浦蔡浦在縣西北俱西接江陰北入揚子江

七浦在昭文縣一名七浦塘一名七鴉浦洩陽城諸湖之水以達於海

千墩浦在崑山縣東南四十里新洋諸江之水匯流於此接吳淞江入海明永樂中太常少卿袁汝奉詔浚之今南流注於澱山湖

黃涇在昭文縣北自陳家市南流至七星橋又新

開洪西自七星橋沿湖港至沈浜東流入白茆港
耿涇在昭文縣坊浜流至大江口

琴川在昭文縣治橫港七派如琴絃然皆發源虞
山東注運河今多湮塞按述異記云梧桐園在吳
宮本吳王夫差舊園也本名鳴琴川後省鳴字沿
稱至今

松江府

崑山在府西北二十三里長谷之東陸氏之先墓

此世謂山因二陸如玉出崑岡得名然士衡詩已
有婉孌崑山之語則山名已在前山形圓秀而潤
傍無附麗望之如覆盎然其上有三聖閣下瞰大
泖在几席間山陰有二陸故居初梁時置崑山縣
遂誤以馬鞍山為崑山其實崑山在華亭不在彼
也松人反以小崑自名山有九峰九峰者一鳳凰
二陸寶今以庫公當之三余四細麻五薛六機七
橫雲八千九崑也在唐宋未名自元凌崑作九峰

詩楊維貞陶宗儀亟稱九峰於是大著

以上華亭縣

橫雲山在崑山東北本名橫山唐天寶中易今名或云以陸士龍名也其巔有白龍洞潛通澗湖深不可測下有祭龍壇歲旱禱焉

小橫山顧志云在橫雲東中限一水隆然而興由絕頂至東北皆峰巒隱起壁立數仞色盡赭人呼為小赤壁盡壁斬然一罅如虎邱試劍石狀前有石可踞而坐下瞰小澗亦九峰奇絕處也陳志云

山之麓有小山招隱元孫稷所居又傳有僊雲館
凝翠軒為蘇東坡遊賞處今廢

機山顧志云在橫雲後南北相望以陸機得名山
下有平原村亦以機為平原內史也前有陂澤人
家散布汀岸若圖畫

千山在機山東九峰中最高大或傳千將曾此
鑄劍舊圖經則云有千姓者居此故名又以形如
天馬稱為天馬山上有浮圖七級登覽者極江海

之觀山頂有雙石魚相傳風雨化去其脅有泉掬以頰面能明目

鍾賈山在干山東一水左限沈經塘與盧山對峙相傳以鍾賈二姓居此得名又名中介山以介在九峰間也

盧山在沈經塘疑亦以盧姓得名

以上婁縣

柘山在金山縣柘湖中湖已涸山在平陸生柘樹因名鄉人祠三姑之神於此

秦山在金山縣張堰鎮西俗謂秦皇曾登此望海
故又稱秦望山山之陽有仙人洞

查山在金山縣張堰南稍東去秦山十餘里舊名
遮山錢袞定為查據集仙外傳云查玉成煉丹海
上小山今山臨海上有浴丹井而鄉名又曰仙
山其當為查無疑也

金山在金山縣海水中舊志云去府九十里周康
王嘗於此築城其北即古之海鹽縣後淪於水山

有平坡可坐其北有寒穴泉明初設衛於華亭以
金山為名又小金山亦在海中元楊維貞云淞之
南有大金小金出沒於雲海之中者是也又金山
東有許山西有浮山勝山又有竹嶼山達岸山蘇
山羊山西北距金山衛七八十里皆在海中而羊
山為尤大

澱山在青浦縣舊通志云在薛澱湖中山形四出
如鼇上建浮圖下有龍洞云通太湖山屹立湖中

今山在平田去湖益遠向有十景俱廢陳志云又西北一小山山皆石骨名箕山

細林山在青浦縣舊名神山唐天寶間易名細林元時仙人彭素雲宅此昔有神龕仙館四字筆法奇異或云呂純陽書明錢溥有細林八景詩甘白

泉在東麓附梁簡文帝細林山銘

神山本名秀林山或稱辰山在

華亭西北二十餘里列九峰第四峰在一方雖非巨麗未經標品而自古神仙往往北跡實震旦之靈阜也余以爲暇結駕游行覽茲佳勝脍馬有懷乃作銘曰園苑天片山稱地維碧雞金馬越瀆梁

池懷靈蘊德孕寶合奇此亦仙岫英名遠鄰昔有
鶯窟不燒淨土邁彼高蹤構茲法宇引葉成帷即
樹為柱石砌危橫崖堦斜豎白巘途遠丹源路深
長林萬頃偉木千尋竹窻看博松間聽琴捐氛蕩
累散賞
娛襟

余山在福泉縣舊傳有余姓者養道於此故名按
吳興志亦有余山上有東漢余將軍廟好事者遂
指此為東余云其高與干山等東西二峰延亘數
里招提蘭若隱見其中望之穠郁深秀明陳繼儒
施紹莘隱此土宜茶有泉名洗心甚清冽產筍香

如蘭康熙五十八年

聖祖仁皇帝南巡

賜御書蘭筍山三字額懸於宣妙寺

薛山在福泉縣余山東中限一水吳地記云昔薛道約居此因名嘗掘地得石誌曰玉屏山形亦肖故又稱玉屏山下有羅池產藕甚佳今池已竭

鳳凰山在福泉縣圖經云山之鎮曰鳳凰以其據九峰之首延頸舒翼宛若鳳翥故名東枕通波西

連玉屏修峻特起羣山拱揖左有青壁高數十仞
勢如削成其上多虬松古藤

庠公山在福泉縣鳳凰山南昔有庠公隱此得名
陳志云土宜盆盎可栽蘭竹

陸寶山在福泉縣本陸氏家山界鳳凰玉屏之間
向列九峰之一後以取土夷為平陸

斡山在福泉縣鳳凰山北顧會浦東距府三十六
里上海之境自此始嘉禾志作竹斡俗呼北斡又

訛為北干以南有干山也舊云土宜美箭故名或傳產鐵今皆無山有玉寶泉甚清冽有雨華洞宋張頭陀隱居於此今塞

福泉山在福泉縣斡山北以有美泉得稱山下皆黃土青浦分縣為福泉以此名

大海環府之東南二境淞江與黃浦會而入焉其會處曰澹口其南與紹興寧波相望耆老云深夜籟寂時越中鷄犬之聲相聞今天日晴明南岸諸

山皆厯厯可指自金山東過勝山為南洋又東至
洋山又東南為南大洋北至高家嘴為蘇州洋又
東為東大洋宋元間諸番貢道皆由青龍市船司
今於上海設海關

松江在府北七十四里上海縣界府因以名一名
吳淞江亦曰松陵江其源出太湖自吳江長橋東
流至尹山北流至甫里東北流至澱山北合趙屯
浦東合大盈浦又東合顧會浦崧子浦盤龍浦凡

五大浦至宋家橋東南流與黃浦會而入海將入

海別為滬瀆在上海縣北十里上有城壘附宋葉

清臣松江賦

澤國秋晴天高水平遙山晚碧極浦寒清循游具區之野縱汎吳淞之濡

東瞰滄海西瞻洞庭槁葉微下斜陽半明樵風歸兮自朝暮夕溜滿兮誰送迎浩霜空兮一色橫霽色兮千名於時積潦未收長江無際澄瀾方興扁舟獨詣社橘初黃汀葭餘翠鷺鷥朋飛別鵠孤唳聽漁柳之遞響聞收笛之長吹既覽物以放懷亦思人而結歡若夫敵寇初平霸圖初盛均憂待濟同安則病魚貪餌而登鈎鹿走險而忘命一旦辭祿揚舲高泳功崇不居名存斯令達識先明孤風孰競又若金耀不融洛塵其蒙宗城寡捍王國爭雄拂衣洛土震耀江東拖翠綸兮波上瞻蟬翼兮

井中倘即時之有適遣我後之為惘至如著書筮
澤端居甫里兩梨汀洲片帆烟水夕醉酒壚朝盤
魚市浮游塵外之物嘯傲人間之世富詞客之多
才劇強人之清思緬三子之清徽諒隨時之有宜
非才高見棄於榮路乃道大不容於禍機申屠臨
河而蹈壑伯夷登山而食薇皆有為而然爾豈得
已而用之別有執簡仙瀛持荷帝柱晨韜史氏之
乍暮俾使臣之斧登覽有澄清之心臨遺動光華
之賦何從欲之流滋慰遠遊之以懼肇提封之所
履屬方割之此慶將游流而匪川其拯濟乎吟時
轉白鶴之新渚嫁青龍之上游濯埃垢於緇袂刮
病膜乎昏眸左引任公之釣右援仲由之杼思勤
官而裕民乃善利之遠猷彼全身以遠害蓋孔臧
於自諫鮮鱗在組真茶滿甌少回俗士之駕亦未
可為歎
江之差

國朝任辰旦吳淞江賦并序

蓋三江為禹治南條之一而吳淞又為禹治三江之一

一也按諸水利實秦鉅焉嗣迪興廢靡常景臻平陸自

國朝受命以來江南紳大夫皆名賢諸濬故道規畫咸備厥功茂矣及余筮仕申江復奉命而踵成之爰為之賦其辭曰
望禹迹之遠數觀江流而思邈
荷擴垠於平沙散辰曜而光矚
區三吳以運靈泉
流奔匯而注之
密雨迴瀉具區之橫波開天臺之
絕輪灼銷夏引松陵合薛澗
純葦城三泖就谷長
萬迅騰激浦下潤風渚地行以暨青龍白鶴之派
羣分條塋莫不趨焉而共寧
況乎月盈而潮汐溇
乾而故盈可蓄
蓄以當雨抑波障以衛耕
溉田疇
之緒錯利旣穡之所乘
軸臚舳舻之接榜
棹禾華
實之滋榮是誠南州之普澤而吳會之弘津也
當夫四序之代移所在靈源之名適派濱溟於桃花

盪姦景於神宅蒲狩延青芷蘋搢白漁火羅揚星連
歌起拍旋且白帝降而寒澄玄女翔而凝澤揚水
窟之高颺濯蘆洲之蟾魄西爽清肅而水下翔風
汨洌而冰積托神理於漣漪成順令而應節數觀
瀾之變遷逝如斯而不息爾乃鷗馱鷓鴣鷓鴣之
羽殊千名以應化鯨鯨鱗鱗之鱗辨萬族以
隨時背螭龜龜蚌貝螺之異種虬蛇蛟蜉蝣之離
奇洵稱寶藏不測之府皆紛蕃詭誕而莫能知若
大陽伏列陣江妃奮武風烈雷殷沙巖雲聚濤翻
駕電之輪浪附靈鼉之鼓激瀉激湍以駭目涌汗
洗溼以肆怒隄岸於焉若撼客子於焉懷股斯又
壑險之巨浸為菘土者責永祐惟是

皇清定鼎上聖下賢習坎向離括坤包乾既河清而海
宴方祥集而瑞全文教丕播於海童豐功胎格於
水仙則江靈之効命以朝宗
因將配有夏而億萬斯年

青龍江在福泉縣東北吳志云孫權造青龍戰艦於此故名普通滬瀆入海浩瀚無涯韓世忠曾駐軍於此其上為巨鎮置市舶司其佳麗擬於杭州元以後江既阻隘鎮亦遂廢明嘉靖間建青浦縣於故址之西後徙今猶稱舊青浦

日月河在府城中普照寺南古識云日月河通出狀元河久湮塞明代成化間知府樊瑩濬之錢福果狀元及第後復淤萬厯間知府許維新又濬之

張以誠狀元及第

倉河在普照寺後明代軍儲北倉在其陽故名西南通豐樂橋東北通波塘與邱家灣水合

玉帶河橫貫府學中如帶故名其源自仙鶴西北行轉而東與集仙門水合

運鹽河在金山縣自城北流至張涇橋與城河接長六十三里凡西南諸水皆由之以入於浦按府別有運鹽河在青村西又東運鹽河在亭林南

舊西湖在府西本名瑁湖因陸子璋養魚池故名
相傳葛稚川嘗煉丹其上故湖中嘗有五色泉郡
人見之必擢高第王安國梅詢許尚俱有題詠後
跨一石梁其上即所謂瑁湖橋以上華亭縣

柘湖在金山縣運鹽河見古蹟

鶯竇湖在上海縣西南五十五里周五里舊有邢
竇二姓居此故名今已淤塞訛為櫻桃匯一作鶯

脰湖

薛澱湖在青浦縣一名澱山湖以中有澱山也其
源自長洲白蜺江經急水港而來周圍幾二百里
實古來鍾水之地北由趙屯浦東由大盈浦入於
松江東南由爛路港以入三泖

蓮湖在青浦縣境東通澱山西通金澤塘

三泖在金山縣太史公云泖之為言茂也晉陸機
對武帝云三泖水冬溫夏涼有上中下三名又曰
圓泖大泖長泖又谷水一名華亭谷吳地記謂陸

氏世居於此故名機詩所謂鬢鬢谷水陽者是也
其西南受浙西諸水西北受澱湖諸水由華亭界
入於黃浦論者以為即三泖故谷水又一名谷泖
云

橫泖在福泉縣自北曹港分支經唐行鎮絕大盈
浦東流為東橫泖為橫塘入盤龍浦

南澹浦在上海縣東北三十六里其支流為東溝
浦西溝浦

都臺浦在上海縣鹹塘東故曹家溝也明天順中
巡撫都御史崔恭所濬上有行臺因名

黃浦在南匯縣西六十里戰國時楚黃歇所鑿土
人因稱為黃浦一稱春申浦其首曰黃潦涇上源
為黃橋斜塘為三泖為澱湖為急水港為白蜆江
其下流經奉賢南匯上海之境而北會吳淞江入
海名上海浦此水視淞婁二江為大故論者以為
即古之東江云海潮一日二至從浦出入詳見水

利

趙屯浦在福泉縣澱山湖北舊直受湖水瀉於松江其闊至五十丈通江五大浦之一也今自北曹港分支北流愈北愈隘浦口束以石梁僅通舟楫而已

大盈浦在福泉縣澱山湖東起自南曹港口北與北曹港合過青龍江又過白鶴匯入於松江

顧會浦在福泉縣大盈之東其上源曰通波塘出

府城北流為祥澤塘遂別為崧子浦至上海縣界
合青龍江入於松江自青龍江既微而其流遂入
於泖盤龍浦亦然

崧子浦在福泉縣舊名崧塘自顧會浦分流注於
松江

盤龍浦在福泉縣崧子浦東其上流曰盤龍塘自
府城東北流入於松江其入江處曰盤龍匯介華
亭崑山之間步其徑纔十許里而迴旋迂緩逾四

十里如龍之盤故名

青村港在奉賢縣南橋塘東達於縣城

龍泉港在奉賢縣招賢涇東

急水港在青浦縣西南五十里長二十餘里闊處至三十丈西接吳江白蚬江乃東江之上流也

南曹港在福泉縣即舊鹹魚港自澱湖東南何家港東流納龍河水東北為斜漚入北曹港又東北為大盈浦南接柘澤東為諸家塘

北曹港在福泉縣西南與崑山分界西合何家港
三分蕩斜滙港諸水東過縣城入橫泖一支北為
新河入趙屯浦一支入大盈浦自蕩而東至西虹
橋皆宏闊迅駛湖水潏以宣洩

白龍潭在府西谷陽門外廣可十餘頃相傳有龍
蟄其下水深而清可滄可釀歲旱禱之有應

泗涇自祥澤塘北折而東合盤龍塘又北東為蒲
匯塘元時為水道之要今皆淤淺

以上婁縣

奉賢涇在奉賢縣洮港東北流入運港華亭分縣
為奉賢以此名

招賢涇在奉賢縣奉賢涇東

從令涇在奉賢縣橫滙東

朱涇在金山縣承嘉善平湖長泖諸水貫市橋東
流水勢湍悍東為橫涇又東為蕩涇其北流者入
於橫滌涇

歸涇在金山縣胥浦塘北

新涇在福泉縣橫灤東古名新涇浦南通蒲匯塘
北入松江其支渠甚多

巨漕在奉賢縣南橋塘北

范家浜在上海縣東即大黃浦明尚書夏原吉所
開

馬家浜在上海縣南通都臺等浦西入吳淞江東
北至界浜與嘉定分界有寶鎮堡在焉

張堰在金山縣北

江南通志卷十二